

四庫全書

史部

欽定四庫全書

史部

浙江通志卷二百七十五

詳校官給事中臣戴璐

檢討臣德生覆勘

總校官編修臣倉聖脉

校對官助教臣胡予襄

膳錄監生臣翟灝

欽定四庫全書

浙江通志卷二百七十五

藝文十七

詩 七言律

西塞山下迴舟作

唐 陶 峴

匡廬舊業是誰主
吳越新居安此身
白髮數莖歸未得
青山一望計還成
鴉翻楓葉夕陽動
鷺立蘆花秋水明
從此舍舟何所詣
酒旗歌扇正相迎

送靈澈上人還越州

唐 劉長卿

禪客無心杖錫還，沃洲深處草堂閒。
身隨敗屨經殘雪，手綻寒衣入舊山。
獨向青溪依樹下，空留白日在人間。
那堪別後長相憶，雲木蒼蒼但閉關。

餞王相公出牧括州

唐 劉長卿

縉雲詎比長沙遠，出牧猶承明主恩。
城對寒山開畫戟，路飛秋葉轉朱轡。
江潮淼淼連天望，旌旆悠悠上嶺翻。
蕭索庭槐空閒閣，舊人誰到翟公門。

送惠法師遊天台山因懷智大師故居

唐
劉長卿

翠屏瀑水知何在，鳥道猿啼過幾重。
落日獨搖金策去，深山誰向石橋逢。
定攀巖下叢生桂，欲買雲中若箇峰。
憶想東林禪誦處，寂寥惟聽舊時鐘。

送台州李使君無寄題國清寺

唐
劉長卿

露冕新承明主恩，山城別是武陵源。
花間五馬時行縣，山外千峰常在門。
晴江洲渚帶春草，古寺杉松深暮猿。

知到應真飛錫處因君一想已忘言

奉和劉採芳縉雲南嶺作

唐
庾光先

百越城池枕海圻永嘉山水復相依
懸蘿弱篠垂清淺宿雨朝暾和翠微
鳥訝山經傳不盡花隨月令數仍稀
幸陪謝客題詩句誰與王孫此地歸

送賀監歸四明應制

唐
李白

久辭榮祿遂初衣曾向長生說息機
真訣自從茅氏得恩波寧阻洞庭歸
瑤臺含霧星辰滿仙嶠浮空島嶼微

借問欲棲珠樹鶴何年却向帝城飛

九日宴浙江西亭

唐 錢起

詩人九日憐芳菊延客高齋宴浙江
漁浦浪花搖素壁西陵樹色入秋窗
木奴向熟懸金實桑落新開瀉玉缸
四子醉時爭諠習笑論黃霸舊為邦

送王少府歸杭州

唐 韓 翃

歸舟一路轉青蘋更欲隨潮向富春
吳郡陸機稱地主錢塘蘇小是鄉親
葛花滿把能消酒梔子同心好贈人

早晚重過漁浦宿遙憐佳句篋中新

酬諸公宿鏡水宅

唐嚴維

幸免低頭向府中貴將藜藿與君同
陽雁叫霜來枕上寒山映月在湖中
詩書何德名夫子草木推年長數公
問道漢家偏尚少此身那比訪芝翁

送崔峒使往睦州兼寄薛司戶

唐嚴維

如今相府用英髦獨往南州肯告勞
冰水近聞漁浦出雪雲初卷定山高
木奴花映桐廬縣青雀舟隨白露濤

使者應須訪廬吏府中惟有范功曹

越溪村居

唐
戴叔倫

年來作客寄禪扉多話貧居在翠微
黃雀數聲催柳變清溪一路踏花歸
空林野寺經過少落日深山伴侶稀
負米到家春未盡風蘿間掃釣魚磯

歸桐廬舊居寄嚴長史

唐
章八元

昨辭夫子擢歸舟家在桐廬憶舊邱
三月暖時花競發兩溪分處水爭流
近聞江老傳鄉語遙見家山減旅愁

或在醉中逢夜雪懷賢應向剡川遊

憶游天台寄道流

唐張佐

憶昨天台到赤城幾朝仙籟耳中生雲龍出水風聲急
海鶴鳴皋日色清石筍半山移步險桂花當澗拂衣輕
今來盡是人間夢劉阮茫茫何處行

送王尊師歸湖州

唐司空曙

煙蕪滿洞青山遶幢節飄空紫鳳飛金闕乍看迎日麗
玉簫遙聽隔花微多開石髓供調膳時御霓裳奉易衣

莫學遼東華表鶴，千年始欲一回歸。

題桐廬李明府官舍

唐崔峒

松堂寂寂對烟霞，五柳門前聚曉鴉。
流水聲中視公事，寒山影裏見人家。
觀風競美新為政，計日還知舊觸邪。
可惜陶潛無限酒，不逢籬菊正開花。

送王侍御佐婺州

唐崔峒

聞君作尉向江潭，吳越風煙到自諳。
客路尋常經竹徑，人家大抵傍山嵐。
緣花木偏宜遠避，地衣冠盡向南。

惟有夜猿啼海樹思鄉望此意難堪

自桐廬如蘭溪有寄

唐 權德輿

東南江路舊知名惆悵春深又獨行
新婦山頭雲半斂女兒灘上月初明
風前蕩颭雙飛蝶花裏間關百轉鶯
滿目歸心何處說欹眠搔首不勝情

送章孝標校書歸杭州因寄白舍人

唐 楊巨源

曾過靈隱江邊寺獨宿東樓看海門
潮色銀河鋪碧落

日光金柱出紅盆不妨公事資高卧無限詩情要細論
若訪郡人徐孺子應須騎馬到沙村

錢塘湖春行

唐白居易

孤山寺北賈亭西水面初平雲脚低幾處早鶯爭暖樹
誰家新燕啄春泥亂花漸欲迷人眼淺草纔能沒馬蹄
最愛湖東行不足綠楊陰裏白沙堤

西湖晚歸回望孤山寺贈諸客

唐白居易

柳湖松島蓮花寺晚動歸橈出道場盧橘子低山雨重

棕櫚葉戰水風涼煙波澹蕩搖空碧樓殿參差倚夕陽
到岼請君回首望蓬萊宮在海中央

杭州春望

唐白居易

望海樓明照曙霞護江堤白蹋晴沙濤聲夜入伍員廟
柳色春藏蘇小家紅袖織綾誇柿蒂青旗沽酒趁梨花
誰開湖寺西南路草綠裙腰一道斜

餘杭形勝

唐白居易

餘杭形勝四方無州傍青山縣枕湖遶郭荷花三十里

拂城松樹一千株夢兒亭古傳名謝教妓樓新道姓蘇
獨有使君年太老風光不稱白髭鬚

江樓夕望招客

唐白居易

海天東望夕茫茫山勢川形濶復長燈火萬家城四畔
星河一道水中央風吹古木晴天雨月照平沙夏夜霜
能就江樓銷暑否比君茅舍較清涼

江樓晚眺景物鮮奇吟翫成篇寄水部張員外

唐白居易

澹烟疎雨間斜陽江色鮮明海氣涼
蜃散雲收破樓閣
虹殘水照斷橋梁風翻白浪花千片
雁點青天字一行
好著丹青圖畫取題詩寄與水曹郎

湖上招客送春汎舟

唐白居易

欲送殘春招客伴客中誰最有風情
兩瓶簪下新開得一曲霓裳初教成
排比管絃行翠袖指麾船舫點紅旌
慢牽好向湖心去恰似菱花鏡上行

元微之除浙東觀察使喜得杭越鄰州先贈長句

唐
白居易

稽山鏡水歡遊地
犀帶金章榮貴身
官職比君雖校小
封疆與我且為隣
郡樓對翫千峰月
江界平分兩岼春
杭越風光詩酒主
相看更合與何人

答微之誇越州州宅

唐
白居易

賀上人回得報書
大誇州宅是仙居
厭看馮翊風沙久
喜見蘭亭烟景初
日出旌旗生氣色
月明樓閣在空虛
知君暗數江南郡
除却餘杭盡不如

微之重誇州居其落句有西州羅刹之謔因嘲茲

石聊以寄懷

唐白居易

君問西州城下事醉中疊紙為君書嵌空石面標羅刹
壓捺潮頭敵子胥神鬼曾鞭猶不動波濤雖打欲何如
誰知太守心相似抵滯堅頑兩有餘

謝微之誇鏡湖

唐白居易

我嗟身老歲方徂君更官高興轉孤軍門郡閣曾聞否
禹穴耶溪得到無酒盞省陪波卷白骰盤思共彩呼盧

一泓鏡水誰能羨
自有胸中萬頃湖

春題湖上

唐白居易

湖上春來似畫圖
亂峰圍繞水平鋪
松排山面千重翠
月點波心一顆珠
碧毯線頭抽早稻
青羅裙帶展新蒲
未能拋得杭州去
一半勾留是此湖

得湖州崔十八使君書喜與杭越鄰郡因成長句

代賀無寄微之

唐白居易

三郎何因此結緣
貞元科第忝同年
故情歡喜開書後

舊事思量在眼前
越國封疆吞碧海
杭城樓閣入青煙
吳興卑小君應屈
為是蓬萊最後仙

西湖留別

唐白居易

征途行色慘風烟
祖帳離聲咽管絃
翠黛不須留五馬
皇恩只許住三年
綠藤陰下鋪歌席
紅藕花中泊妓船
處處回頭盡堪戀
就中難別是湖邊

答客問杭州

唐白居易

為我踟躕停酒盞
與君約略說杭州
山名天竺堆青黛

湖號錢塘瀉綠油大屋簷多裝雁齒小航船亦畫龍頭
所嗟水路無三百官繫何因得再游

送姚杭州越任因思舊游二首

唐白居易

與君細話杭州事為我留心莫等閒閭里固宜勤撫恤
樓臺亦要數躋攀笙歌縹緲虛空裏風月依稀夢想間
且喜詩人重管領遙飛一醺賀江山

渺渺錢塘路幾千想君到後事依然靜逢竺寺猿偷橘
間看蘇家女採蓮故妓數人憑問訊新詩兩首倩流傳

舍人雖健無多興老校當時八九年

衢州徐員外使君遺以縞紵無竹書箱因成一篇

用答佳貺

唐
劉禹錫

爛柯山下舊仙郎列宿來添婺女光
遠放歌聲分白紵知傳家學與青箱
水朝滄海何時去蘭在幽林亦自芳
聞說天台有遺愛人將琪樹比甘棠

白舍人自杭州寄新詩有柳色春藏蘇小家之句

因而戲酬無寄浙東元相公

唐
劉禹錫

錢塘山水有奇聲暫謫仙官領百城
女妓還聞名小小使君誰許喚卿卿
鼉驚震海風雷起蜃闢噓天樓閣成
莫道騷人在三楚文星今向斗牛明

謝浙東李侍郎越州春晚即事長句

唐
劉禹錫

越中藹藹繁華地秦望峰前禹穴西
湖草初生遶雁去山花半謝杜鵑啼
青油畫卷臨高閣紅旆晴翻繞古堤
明日漢庭徵舊德老人爭出若耶溪

答東陽于令寒碧圖詩

唐 劉禹錫

東陽令于興宗丞相燕國公之猶子生綺襦紈袴間
所見皆貴盛而挈然有心如山東書生前年白有司
願為親民官以自効遂補東陽及涖官以簡易為治
故多暇日一旦於縣五里偶得奇境埋沒於翳薈中
于生自以有特操而生於公侯家由覆蔭入仕常忽
忽欲息因移是心開挾泉石芟去蘿葛斧凡材菴息
壤而清谿翠巖森立空來因構亭其端題曰寒碧碧

流貫於庭中如青龍蜿蜒冰徹射人樹石雲霞列於
前昏旦萬狀惜其居地不得有聞於時故圖之來乞
辭既無負尤物予亦久翳蘿蔭者睹之慨然遂賦七
言以貽後之文士

東山本是佳山水何況曾經沈隱侯化得邦人解吟詠
如今縣令亦風流新開潭洞疑仙境遠寫丹青到雍州
落在尋常畫師手猶能三伏凜生秋

贈李杭州

唐
張籍

仙郎白首未歸朝應為蒼生領六條
惠化州人盡清淨
高情野鶴與逍遙竹間虛館無朝訟
山畔青田長夏苗
終日政閒時獨坐開門長望浙江潮

送王十一郎游剡中

唐張籍

越州都在浙河灣塵土消沉景象閒
百里油盆鏡湖水
千峰鈿朶會稽山軍城樓閣隨高下
禹廟烟霞自往還
想得王郎乘畫舸幾回明月墜雲間

餘杭周從事以十章見寄詞調清婉難於遍酬聊

和詩首篇以答來貺

唐元稹

擾擾紛紛旦暮間
經營閒事不曾閒
多緣老病推辭酒
少有工夫羨山清
夜笙歌喧四郭
黃昏鐘漏下重關
何由得似周從事
醉入人家醒始還

重誇州宅旦暮景色無酬前篇末句

唐元稹

仙都難畫亦難書
暫合登臨不合居
繞郭烟嵐新雨後
滿山樓閣上燈初
人聲曉動千門闕
湖色宵涵萬象虛

為問西州羅剎岬濤頭衝突近何如

和樂天早春見寄

唐元稹

雨香雲淡覺微和誰送春聲入棹歌
萱近北堂穿土早柳偏東面受風多
湖添水色消殘雪江送潮頭湧漫波
同受新年不同賞無由縮地欲如何

天台

唐牟融

碧溪流水泛桃花樹繞天台迴不賒
洞裏無塵通客境人間有路入仙家
雞鳴犬吠三山近草靜雲和一徑斜

此地不知何處去暫留瓊珮卧烟霞

杭州天竺靈隱二寺頃歲一布衣一游及赴鎮會
稽不敢以登臨自適竟不復到寺寺多猿猴謂
之孫團彌長其類因追思為詩二首

唐
李紳

翠巖幽谷高低寺十里松風碧嶂連
開盡春花芳草澗徧通秋水月明泉石文
照日分霞壁竹影侵雲拂暮烟
時有猿猴擾鐘磬老僧無復得安禪

人烟不隔江城近水石雖清海氣深波動只觀羅刹相
靜居難識梵王心魚扃畫鏤龍宮寶雁塔高摩欲界金
近日尤聞重雕飾世人遙禮二檀林

若耶溪

西施採蓮歐
冶鑄劍所

唐

李紳

嵐光花影繞山陰山轉花稀到碧潯傾國美人妖艷遠
鑿山良冶鑄鑪深凌波莫惜臨妝面瑩鏐當期出匣心
應是蛟龍長不去若耶秋水尚沉沉

宿越州天王寺

唐

李紳

太和八年自浙東觀察使又除太子賓客分司東都
始發州郭越人父老男女數萬攜壺觴至江津相送
海隅布政暫期月江上霑巾媿萬人休按簿書懲黠吏
未齊風俗昧良臣壺冰自潔中無玷鏡水非求下見鱗
清夜佛宮觀色相却歸前老更前身

却渡西陵別越中父老

唐李紳

海潮晚上江風急津吏篙師語默齊傾手奉觴看故老
擁流爭拜見孩提慙非杜母臨襄峴自比朱翁別會稽

漸舉雲帆烟水闊
杳然鳬雁各東西

却到西浙

唐李紳

出杭州界入蘇州八年浙西六郡災旱百姓飢殍道
路相望米價翔貴是歲浙東大稔因請出米五萬斛
賤估以救浙西居人詔下蒙允是歲王璠不奏飢旱
反怒鄰境所救以為賣已遂與王涯合計誣構罔上
奏陳米非官米足私求利及璠伏誅蒙聖恩加察姦
邪所罔初入浙西蘇州界吳人以卹災之惠猶懼旌

幡留戒於迴野之處不及城郭之所則相率拜泣於
舟楫前是歲盧周仁為蘇州刺史

臨平水竭蕪葭死里社蕭條旅館秋嘗歎晉郊無乞糴
豈忘吳俗共分憂野悲揚目稱嗟食林極翳桑顧所求
苛政尚存猶惕息老人偷拜擁前舟

欲到西陵寄王行周

唐李紳

西陵沙岬回流急船底黏沙去岬遙驛吏遞呼催下纜
擢郎間立道齊橈猶瞻伍相青山廟未見雙童白鶴橋

欲責舟人無次第自知貪酒過春潮

送端上人游天台

唐施肩吾

師今欲向天台去來說天台意最真溪過石橋為險處
路逢毛褐是真人雲邊望寺鐘聲遠雪裏尋僧腳跡新
只可且論經夏別莫教琪樹兩回春

送僧貞實歸杭州天竺

唐姚合

石橋寺裏最清涼聞說茅菴寄上方林外猿聲連院磬
月中湖色到禪牀他生念我身何在此世唯師性亦忘

九陌相逢千里別青山重疊樹蒼蒼

天竺寺殿前立石

唐姚合

補天殘片女媧拋撲落禪門壓地坳霹靂劃深龍舊攬
屈槃痕淺虎新抓苔粘月眼風挑別塵結雲頭雨磕敲
秋至莫言長屹立春來自有薜蘿交

杭州官舍偶書

唐姚合

錢塘刺史謾題詩貧病無恩懦少威春盡酒杯花影在
潮迴畫檻水聲微聞吟山際邀僧上暮入林中看鶴歸

無術理人人自理朝朝漸覺簿書稀

題於越亭

唐張祐

扁舟亭下駐烟波十五年游重此過洲
背露沙人渡淺樹梢藏竹鳥啼多山
銜落照欹紅蓋水蹙斜文捲綠羅
腸斷中秋正圓月夜來誰唱異鄉歌

送元處士游天台

唐朱慶餘

青冥路口絕人行獨與僧期上赤城
樹列烟嵐春更好溪藏冰雪夜偏明
空山雉雘木苗短野館風來竹氣清

若過石橋看瀑布不妨高處便題名

吳興新隄

唐朱慶餘

春隄一望思無涯樹勢還同水勢斜深映菰蒲三十里
晴分功利幾千家謀成既不勞人力境遠微偏隔浪花
若與青山長作固汀洲肯恨柳絲遮

早發天台中巖寺度關嶺次天姥岑

唐許渾

來往天台天姥間欲求真訣駐衰顏星河半落巖前寺

雲霧初開嶺上闌
丹壑樹多風浩浩
碧溪苔淺水潺潺
可知劉阮逢人處
行盡深山又是山

游錢塘青山李隱居西齋

唐許渾

小隱西齋為客開
翠蘿深處遍蒼苔
林間掃石安棋局
巖下分泉遞酒盃
蘭葉露光秋月
上蘆花風起夜潮來
雲山遶屋猶嫌淺
欲棹漁舟近釣臺

送劉郎中牧杭州

唐薛逢

一州橫制浙江灣
臺榭參差積翠間
樓下潮回滄海浪

枕邊雲起剡溪山
吳江水色連隄闊
越俗春聲隔岫還
聖代牧人無遠近
好將能事濟清間

送慶上人歸湖州因寄道儒座主

唐

薛逢

上人今去白蘋洲
雲水蒼溪我舊游
夜雨暗江漁火出
夕陽沉浦雁花收
聞聽別鳥啼紅樹
醉看歸僧棹碧流
若見儒公憑寄語
數莖霜鬢已驚秋

九日陪越州元相燕龜山寺

唐

趙嘏

佳晨何處泛花游
丞相筵開水上頭
雙影旆搖山雨霽

一聲歌動寺雲秋
林光靜帶高城晚
湖色寒分半檻流
共賀萬家逢此節
可憐風物似荊州

浙東陪元相公游雲門寺

唐趙嘏

松下山前一徑通
燭迎千騎滿山紅
溪雲乍斂幽巖雨
曉氣初高大旆風
小檻宴花容容醉
上方看竹與僧同
歸來吹盡嚴城角
路轉橫塘亂水東

送張又新除溫州

唐趙嘏

東晉江山稱永嘉
莫辭紅旆向天涯
凝絃夜醉松亭月

歇馬曉尋溪寺花地與剡川分水石境將蓬島共烟霞
却愁明詔徵非晚不得秋來見海槎

劉阮再到天台不見仙子

唐

曹

唐

再到天台訪玉真青苔白石已成塵笙歌冥冥聞深洞
雲鶴蕭條絕舊隣草樹總非前度色烟霞不似昔年春
桃花流水依然在不見當時勸酒人

自縉雲赴郡溪流百里輕擢一發曾不崇朝叙事

四韻獻段郎中

唐

方干

激箭溪湍勢莫憑飄然一葉若無乘
仰瞻青壁開天罅
斗轉寒灣避石稜
巢鳥夜驚離島樹
啼猿晝怯下巖藤
此中明日尋知己
恐似龍門不易登

題桐廬謝逸人江居

唐方干

少小高眠無一事
五侯七貴欲如何
湖邊倚杖寒吟苦
石上橫琴夜醉多
鳥自樹梢隨果落
人從窗外却帆過
由來朝市為真隱
可要棲身向薜蘿

因話天台勝景奇
仍送羅道士

唐方干

積翠千層一徑開遙盤山腹到瓊臺
藕花飄落前巖去桂子流從別洞來
石上叢林礙星斗窗邊瀑布走雲雷
縱雲孤鶴無留滯定恐烟蘿不放回

和剡縣陳明府登縣樓

唐方干

郭裏人家如掌上簷前樹木映窗櫺
烟霞若接天台地分野應侵婺女星
驛路古今通北闕仙溪日夜入東溟
綵衣才子多吟嘯公退時時見畫屏

送孫百篇游天台

唐方干

東南雲路落斜行入樹穿村見赤城
遠近常時皆藥氣高低無處不泉聲
映巖日向牀頭沒濕燭雲從柱底生
更有仙花與靈鳥恐君多半未知名

石門瀑布

唐方干

奔傾漱石亦噴苔此是便隨元化來
長片掛巖輕似練遠聲離洞咽於雷
氣含松桂千枝潤勢畫雲霞一道開
直是銀河分派落無聞碎滴濺天台

思桐廬舊居便送鑒上人

唐方干

莫道東南路不賒思歸一步是天涯林中夜半雙臺月
洲上春深九里花綠樹遠村含細雨寒潮背郭卷平沙
聞師却到鄉中去為我殷勤謝酒家

錢塘江湖

唐羅隱

怒聲洶洶勢悠悠羅剎江邊地欲浮漫道往來存大信
也知反覆向平流狂拋巨浸疑無底猛過西陵只有頭
至竟朝昏誰主掌好騎鯨鯢問陽侯

雪溪晚泊寄裴庶子

唐羅隱

溪風如扇雨如絲閒步閒吟柳惲詩杯酒清狂非曩日
野花狼籍似當時道窮設有依劉感才急應無借冠期
滿眼雲山莫相笑與君俱是受深知

春日行次錢塘却寄台州姚中丞

唐

杜荀鶴

豈為無心求上第難安帝里為家貧江南江北閒為客
潮去潮來老却人兩岼雨收鶯語柳一樓風滿角吹春
花前不獨垂鄉淚曾是朱門寄食身

桐廬縣作

唐

韋莊

錢塘江盡桐廬縣水碧山青畫不如白羽鳥飛嚴子瀨
綠叢人釣季鷹魚潭心倒影時聞合谷口閒雲自卷舒
此境只應詞客愛投文空弔木玄虛

游靈隱天竺二寺

唐徐黃

丹井冷泉虛易到兩山真界實難名石和雲霧蓮花氣
月過樓臺桂子清騰踏回橋巡像設羅穿曲洞出龍城
更憐童子呼猿去颯颯蕭蕭下樹行

天台瀑布

唐曹松

萬仞得名云瀑布遠看如織掛天台休疑寶尺難量度
直恐金刀易剪裁噴向林梢成夏雪傾來石上作春雷
欲知便是銀河水墮落人間合却迴

贈溫州韓使君

唐陳陶

康樂風流五百年永嘉鈴閣又登賢嚴城鼓動魚驚海
華屋尊開月下天內史筆鋒光紫牘鄢陵詩句滿山川
今年誰似名家貴越絕麾幢雁影連

送張監察通判餘杭

宋王禹偁

郡城瀟灑浙江濱暫輟乘驄慰遠民莫放霜威誇御史
且收風景屬詩人雪侵樓上迎潮眼花擁湖中泛月身
盡是公餘吟詠處好飛佳句寄詞臣

寄杭州昭慶寺華嚴社主省常上人

宋

王禹偁

夢幻吾身是偶然勞生四十又三年任誇西掖吟紅藥
何似東林種白蓮入定雪龕燈焰直講經霜殿磬聲圓
謫官不得餘杭郡空寄高僧結社篇

天章道中

宋 蘇舜欽

畫鷁低飛湖水平高低樓閣滿稽城人游鑑裏山相照
魚戲空中日共明盡是荷風香不斷忽逢溪雨氣猶清
籃輿却上蘭亭步猿鳥雲蘿伴此行

大禹寺

宋 蘇舜欽

鑑湖盡處衆峰前寺古蕭疎水石間殿角北垂連禹廟
松篁束去入稽山望中巖鳥自上下吟久溪雲對往還
我厭區區走名宦未能來此一生閒

蓬萊高與卧龍俱位望無崇似合符絃管夜深傳并邑
樓臺春影蘸江湖休功即報期年政直節曾行萬里途
真是玉皇香案吏坐看歸去贊蘿圖

次韻前人蓬萊閣卽事

宋趙抃

蓬萊窗外曉光分夢覺初驚杜宇魂但有吏供衙府喏
斷無人到訟庭喧濛濛宿霧開湖面隱隱更潮過海門
一水兩州皆重鎮越清杭劇不同論

陪趙少師遊西湖無簡生客

宋趙抃

絲管喧喧擁畫船
澄澗上下照紅蓮
一樽各盡十分酒
四老共成三百年
北闕音書休憶念
西湖風物且留連
杭民夾道焚香看
白髮朱顏長壽仙

送余少卿知睦州

宋梅堯臣

青山峽裏桐廬郡
七里灘頭太守船
雲霧未開藏宿鳥
坡原將近見燒田
養茶摘蕊新春後
種橘收包小雪前
民事蕭條官政簡
家書時問雪溪邊

湖山小隱二首

宋林逋

道着權名便絕交一峰青翠濕衡茅莊生已憤鴟鵂嚇
揚子休譏蜉蝣嘲滴滴藥泉來石竇霏霏茶靄出松梢
琴僧近借南薰譜且併閒工仔細抄

閒搭綸巾擁縹囊此心隨分識興亡黑頭為相雖無詔
白眼看人亦未妨雲噴石花生劒壁雨敲松子落琴牀
青猿幽鳥遙相叫數筆湖山又夕陽

湖上晚歸

宋
林逋

卧枕船舷歸思清望中渾恐是蓬瀛橋橫水木已秋色

寺倚雲峰正晚晴
翠雨濕飛如見避
紅蕖香嫋似相迎
依稀漸近誅茅地
雞犬林蘿隱隱聲

湖上初春偶作

宋林逋

梅花開盡臘亦盡
晴暖便如寒食天
春色半歸湖舴柳
人家多上郭門船
文禽相並映短草
翠潏欲生浮嫩烟
幾處酒旗山影下
細風時已弄繁絃

西湖春日

宋林逋

爭得才如杜牧之
試來湖上輒題詩
春烟寺院敲茶鼓

夕照樓臺卓酒旗，濃吐雜芳重懽。夢濕飛雙翠，破漣漪。
人間幸有蓑蓴笠，且上漁舟作釣師。

秋日湖西晚歸舟中書事

宋林逋

水痕秋落蟹螯肥，閒過黃公酒舍歸。魚覺船行沈草岸，
犬聞人語出柴扉。蒼山半帶寒雲重，丹葉疎分夕照微。
却憶青溪謝太傅，當時未解惜蓑衣。

孤山寺端上人房寄望

宋林逋

底處憑欄思渺然，孤山塔後閣西偏。陰沈畫軸林間寺，

零落棋枰葑上田秋景有時飛獨鳥夕陽無事起寒烟
遲留更愛吾廬近祇待重來看雪天

孤山寺

宋 林逋

雲峰水樹南朝寺祇隔叢篁作並鄰破殿靜披蘿白古
齋房閒試酪奴春白公睡閣幽如畫張祐詩碑妙入神
乘興醉來拖木屐翠苔蒼蘚石磷磷

桐廬郡齋書事

宋 范仲淹

千峰秀處白雲驕更隱雲邊豈待招數仞堂高誰富貴

一枝巢隱自逍遙
杯中好物閒宜進
林下幽人靜可邀
莫道官清無歲計
滿山芝朮長靈苗

與人約訪林處士阻雨

宋 范仲淹

閒約諸公扣隱扃
江天風雨忽飄零
方憐春滿王孫草
可恨雲遮處士星
蕙帳未容登末席
蘭舟無賴寄前汀
湖山早晚逢晴霽
重待尋仙入翠屏

寄會稽丞趙振道

宋 孔文仲

龜峰蜿蜒翠成堆
軒檻前當秀色開
此地登臨比圖畫

與君談笑繼樽罍傳聞佳景無時乏依舊清江不斷來
今日關河隔千里相逢何處少徘徊

和謝主簿游西湖

宋韓維

雲陰開剝日光穿和氣隨風近酒船湖面波清渾見底
樓頭山碧自生烟興長不忍回孤櫂歌懶才能逐緩絃
因子尊前話歸計醉魂先到峴山邊

送張仲容赴杭州孫公辟

宋王安石

萬屋相誇添與丹笑歌常在綺紈間綵船春戲城邊水

畫燭秋尋寺外山憶我屢隨游客入喜君今赴辟書還
遙知曼倩威行久赤筆應從到日間

宿水陸寺寄北山清順僧二首

宋蘇軾

草沒河隄雨暗村寺藏脩竹不知門拾薪煮藥憐僧病
掃地焚香淨客魂農事未休侵小雪佛燈初上報黃昏
年來漸識幽居味思與高人對榻論

長孃鐘鼓聒湖山北境蕭條却自然乞食遶村真為飽
無言對客本非禪披榛覓路衝泥入洗足闔門聽雨眠

遙想後身窮賈島夜寒應聳作詩肩

有以官法酒見餉者因用前韻求述古為移廚飲

湖上

宋 蘇軾

喜逢門外白衣人欲膾湖中赤玉鱗游舫已裝吳榜穩
舞衫初試越羅新欲將魚釣追黃帽未要靴刀抹絳巾
芳意十分強半在為君先踏水邊春

新城道中

宋 蘇軾

東風知我欲山行吹斷簷間積雨聲
嶺上晴雲披絮帽

樹頭初日挂銅鉦野桃含笑竹籬短溪柳自搖沙水清
西崦人家應取樂煮芹燒笋餉春耕

會客有美堂周邠長官與數僧同泛湖往北山湖

中間堂上歌笑聲以詩見寄因和

宋
蘇軾

載酒無人過子雲掩關晝卧客書裙歌喉不共聽珠貫
醉面何因作纈紋僧侶且陪香火社詩壇欲斂鸛鵝軍
憑君徧遶湖遶寺漲淥晴來已十分

初自選山歸述古名飲介亭以病先起

宋
蘇軾

西風初作十分涼喜見新橙透甲香
遲暮賞心驚節物
登臨病眼怯秋光
慣眠處士雲
菴裏倦醉佳人錦瑟傍
猶有夢回清興在
卧聞歸路樂聲長

九日尋臻閣黎泛舟至懃師院
宋
蘇軾

湖上青山翠作堆
葱葱鬱鬱氣佳哉
笙歌叢裏抽身出
雲水光中洗眼來
白足赤髭迎我笑
拒霜黃菊為誰開

明年桑亭煎茶處憶著衰翁首重迴

皎然有九日與陸羽煎茶詩余來年

九日去
此久矣

去杭十五年復遊西湖用歐陽察判韻

宋
蘇軾

我識南屏金鯽魚重來拊檻散齋餘還從舊社得心印
似省前生覓手書對合平湖久蕪漫人經豐歲尚凋疎
誰憐寂寞高常侍老去狂歌憶孟諸

常潤道中有懷錢唐寄述古

宋
蘇軾

草長江南鶯亂飛年來事事與心違
花開後院還空落燕入華堂怪未歸
世上功名何日是尊前點檢幾人非
去年柳絮飛時節記得金籠放雪衣
杭人以放鴿為太守壽
浮玉山頭日日風湧金門外已春融
二年魚鳥渾相識三月鶯花付與公
剩看新翻眉倒暈未應泣別臉消紅
何人織得相思字寄與江邊北向鴻

烟雨樓

處州

宋鄭俠

仙人居處即龍宮更作層樓峭倚空
羣岫西來烟漠漠

大江南去雨濛濛花鑷柳策熙怡裏耘笠漁蓑笑語中
別有夜楹千里月凭欄清興與誰同

鑑湖道中

宋陳造

風烟佳處放歸桡吟坐篷窗首屢搔萬壑千巖爭獻狀
三江九堰自忘勞尚多菡萏張秋錦少待蟾蜍印夜濤
繚碧深青誰子宅未容載酒訪清高

智勇師歸永嘉自言所居在萬竹間乞詩送行

宋韓駒

上人歸去家何許萬竹深園一把茅踏盡叢林參白足
却來江檻俯青郊夜階簌簌風翻籜春路冥冥雨放梢
肯拚清陰分百十暮年思與子論文

游龍瑞宮次程公韻

宋秦觀

靈祠真館閤山隈形勢相高對月臺莓徑翠依屏上轉
藕花紅遠檻中開鶴御寶箭排烟去龍護金書帶雨來
夾道萬星攢騎火滿城爭看使君回

和孫莘老游龍洞

宋秦觀

葦蕭傳火度冥冥乍入清都醉魄醒草隱月岷垂鳳尾
風生陰穴帶龍腥壁間泉貯千鍾碧門外天橫數尺青
更欲扶筇留頃刻却疑朝市已千齡

南漪堂

宋沈邁

山遶湖堂寺遶山平生願向北中間青雲白水相浮蕩
野客高僧獨往還少壯無嫌軒冕累因循將恐鬢鬢斑
南漪最是逍遙地且挹清波濯媿顏

舟過荻塘

宋沈與求

野航春入荻芽塘遠意相傳接渺茫落日一篙桃葉浪
薰風十里藕花香河回遽失青山曲菱老難容碧草芳
村北村南歌自答懸知歲事到金穰

登桐君祠堂

宋楊時

霜染溪楓葉葉丹翠鱗浮動夕波間盤盤路轉千峰表
冉冉雲扶兩腋間掠水輕鷗晴自戲凌雲飛雁暮爭還
結廬姓字無人會靜對庭陰一解顏

臘月望日出郊探春遊告成觀謁大禹祠酌菲飲

泉遂至龍瑞宮觀禹穴薄暮而還

宋王十朋

禹葬稽山不記年丹青落盡廟依然神文秘在藏書穴
儉德流為菲飲泉龍瑞峰巒高近日鑑湖烟水濶浮天
東州仕處略經眼自笑探奇效馬遷

林黃中少卿出守吳興芮國器司業以詩送之有

今日桐城王刺史昔時遺愛在吾州之句用韻

寄二公二首

宋王十朋

出處平時正且嚴猶於瓜李謹疑嫵兩溪水照新明月

湖州有明月樓

六客堂逢舊紫髯

孫莘老美髯髯嘗守吳興

安定化應孚學

校謝公恩已結閭閻湖山清遠使君好想見邦人慰所
瞻

賢關今日陽司業家在白蘋溪上州筆下波瀾含震澤
胸中意氣屬清流弁山疊拜南金贈泉嶺遙蒙明月投
老去惟公獨青眼一言褒借勝封侯

宿妙庭觀

並雙成故宅

宋王十朋

小小琳宮氣象清
雲旂遐想董雙成
靈丹煉就覆金鼎
仙鶴歸來聞玉笙
兩絕老坡吟句境
千秋太白曲中名
塵埃奔走東歸客
寄卧一菴聽雨聲

西湖泛舟

宋朱松

望湖楼下照衰顏
羞見塵埃兩鬢斑
風艇縱看山轉側
烟隄儘逐水回還
喚人歸去城鐘急
觸處相親嶺月彎
不用新詩摹絕境
定知長到夢魂間

伏承侍郎使君垂示所與少傅國公唱酬西湖佳

句謹次高韻聊發一笑

宋朱熹

越王城下水融融此樂從今與衆同
滿眼芰荷方永日轉頭禾黍便西風
湖光盡處天容濶潮信來時海氣通
酬唱不誇風物好一心憂國願年豐

桐廬舟中見山寺

宋朱熹

一山雲水擁禪居萬里江樓遠屋除
行色匆匆吾正爾春風處處子何如
江湖此去隨鷗鳥粥飯何時共木魚
孤塔向人如有意他年來借一蘆簑

七字謝紹興帥邱宗卿惠楊梅

宋楊萬里

越絕諸楊勝一時與儂瓜葛不曾知老夫自笑吾衰矣
此客何從夢見之也解過江尋德祖政緣作尹是邱遲
渠伊不是南村派未分先驅事荔枝

沈虞卿秘監招游西湖

宋楊萬里

蘇公堤遠柳生烟和靖園深竹映關船入芰荷香處去
人從雲水國中還似寒如暖清和在欲雨翻晴頃刻間
能為蓬萊老仙伯一杯痛快吸湖山

餘杭道中

宋 范成大

落花流水淺深紅，盡日帆飛繡浪中。
桑眼迷離應欠雨，麥鬚騷颯已禁風。
牛羊路杳千山合，雞犬村深一徑通。
五柳能消多許地，客程何苦鎮匆匆。

次韻韓無咎石司上巳汎湖

宋 范成大

休沐良辰不待晴，徑稱閒客此間行。
春衫欺雨應教冷，病眼得山元自明。
抹黛濃嵐圍坐晚，揉藍新淥沒篙清。
棲鴉未到催歸去，想被東風笑薄情。

與長文正夫遊北山

宋 范成大

柳岬松門勝處通，馬蹄踏霧入空濛。
春光有力欺遊子，天色無情沒斷鴻。
雨脚遠連山脚暗，杏梢斜倚竹梢紅。
紀袁擁鼻吾衰矣，年少猶慙料峭風。

李翬知縣作亭西湖上，余用東坡語名之曰飲綠。

遂為勝槩

宋 范成大

芷葺蓮巢喚客遊，蘆鞭席帽為君留。
未論吹水堪添酒，且要移床學枕流。
乍霽却陰梅釀雨，暫暄還冷麥吹秋。

石湖也似西湖好煩向蒼烟問白鷗

上虞逆旅見舊題歲月感懷

宋
陸游

舴艋為家東復西今朝破曉下前溪
青山缺處日初上孤店開時鶯亂啼
倦枕不成千里夢壞牆間覓十年題
漆園傲吏猶非達物我區區豈足齊

雨後集湖上

宋
陸游

野水交流自滿畦芳池新漲恰平堤
花藏密葉多時在鶯占高枝盡日啼
繡袂寶裙催結束金樽翠杓共提攜

白頭自喜能狂在笑擘蠻牋落醉題

歸雲門

宋
陸游

萬里歸來值歲豐解裝鄉墅樂無窮
甌炊飽雨湖菱紫
篾絡迎霜野柿紅
壤壁塵埃尋醉墨
孤燈餅餌對鄰翁
微官行矣闕山去又寄千巖夢想中

自雲門之陶山肩輿者失道行亂山中有茅舍小
塘極幽邃求見主人不可意其隱者也

宋
陸游

陂池幽處有茅堂，井臼蕭條草樹荒。
小鴨怯波時聚散，病蔬傷凍半青黃。
兒童衝雨收漁網，婢子聞鐘上佛香。
我亦暮年思屏跡，數椽何計得連牆。

臨安春雨初霽

宋陸游

世味年來薄似紗，誰令騎馬客京華。
小樓一夜聽春雨，深巷明朝賣杏花。
矮紙斜行閒作草，晴窗細乳戲分茶。
素衣莫起風塵歎，猶及清明可到家。

自上竈過陶山

宋陸游

宿雨初收見夕陽縱橫流水入陂塘
螭家忌客門門閉
茶戶供官處處忙
綠樹村邊停醉帽
紫藤架底倚胡床
不因蕭散遺塵事
那覺人間白日長

雲門感舊

宋陸游

總角來游老未忘
背人歲月去堂堂
稗松看到偃霜蓋
廢寺憶曾開寶坊
佛几古燈寒焰短
齋廚新粟午炊香
興闌未忍登車去
更倚溪橋立夕陽

東關二首

宋陸游

路入東關物象奇
角巾老子曳筇枝
蠹如黑蟻桑生後
秧似青針水滿時
穿市不嫌微雨濕
過溪翻喜壞橋危
當年野店題詩處
又典春衣具午炊

雲蹙魚鱗襯夕陽
放翁繫纜水雲鄉
一筇疾步人驚健
斗酒高歌自笑狂
風暖市樓吹絮雪
蠹生村舍采桑黃
東阡西陌無窮樂
底事隨人作許忙

戲咏山陰風物

宋陸游

萬里秦吳稅駕遲
還鄉已歎鬢成絲
城邊綠樹山陰道

水際朱扉夏禹祠項里楊梅鹽可徹

太白梁園吟云玉盤楊梅為君設吳

鹽如花皎白雪不知楊梅酸者乃薦以鹽佳品未嘗用也

湘湖蓴菜鼓偏宜

蓴菜最宜鹽鼓

所謂未下鹽鼓者言下鹽鼓則非羊酪可敵蓋咸言蓴羹之美耳

圖經草草尚堪恨好

事他年采此詩

與兒輩泛舟西湖一日間晴陰屢易

宋陸游

逢著園林即款扉酌泉瀉筍欲忘歸楊花正與人爭路
鳩語還催雨點衣古寺題名那復在後生識面自應稀

傷心六十餘年事雙塔依然在翠微

梅市暮歸三山

宋 陸游

白日蠻童佩一壺壺乾時亦復村酤橫林露塔遠猶見
暮靄籠山淡欲無綠浦例憑菰作界畫橈常遣鷺前驅
此身元是滄浪客敢學高人乞鏡湖

梅市

宋 陸游

沙際人家半掩扉借炊小住不相違水生溪面大魚躍
風定草頭雙蝶飛竹院游僧聞鼓集烟畦老圃荷鋤歸

浩然物外真堪樂回首浮生萬事非

自九里平水至雲門陶山歷龍瑞禹祠而歸凡四

日

宋
陸游

細雨如絲映晚暉店家小憩換征衣
春農耕罷負犁去村社祭餘懷肉歸
黃犢自依殘照卧白鷗爭傍小灘飛
道邊舊識凋零盡誰記遼天老令威

老子山行肯遽回直穿聲磬上崔嵬
未誇脚力如平昔且喜眉頭得暫開
廟後故梁龍化去山前遺箭鶴銜來

囊錢已盡君無笑草草猶能把一杯

興似雞栖寄兩竿山程三月尚春寒麥苗吐穗初成實
梅子生仁已帶酸買飯猶勝乞墻客看耕借學勸農官
還家莫道虛懷袖笋蕨隨宜亦滿盤

點點桃花糝綠苔入門倚杖意悠哉數聲茶板齋初散
一片溪雲雨欲來老宿龍鍾嗟獨在高松磊砢憶新栽
世間萬事俱難料他日重遊更幾回

項游龍井得一聯王伯齊同兒輩游因足成之

宋樓鑰

路入風篁上翠微老龍蟠井四山圍水真綠淨不可唾
魚若空行無所依勝處雖多終莫及舊游誰在事皆非
祇今覓繫何由到徒羨聯鑣帶月歸

海潮圖

宋樓鑰

錢塘佳月照青霄壯觀仍看半夜潮每恨形容無健筆
誰知收拾在生綃蕩搖直恐三山沒咫尺真成萬里遙
金闕岩堯天尺五海王自合日來朝

借居湖上

宋 趙師秀

出仕歸來貧似舊，借園偶近畫橋居。
縱觀不用春攜酒，清興何妨夜讀書。
港小只通閒客棹，樹低多礙故人車。
向時城裏緣塵土，久欲湖邊住歲餘。

孤山寒食

宋 趙師秀

二月芳菲在水邊，旅人消困亦隨緣。
晴舒蝶翅初勻粉，雨壓楊花未放綿。
有句自題閒處壁，無錢難買貴時船。
最憐隱者高眠地，日日春風是管絃。

郡中游觀之地清風樓為第一前此諸公有詩似
覺摹寫未盡輒成唐律一篇約魏倅同賦

宋
王炎

山屏四面碧相重苔雪無聲瀉玉虹萬戶連甍皆在下
一樓飛棟獨當中不容半點浮塵到但覺無邊爽氣通
安得翛然辭物役披襟終日挹清風

墨妙亭

宋
王炎

晉唐書草可同科藥石雕鐫更不磨幾載雨淋無日炙

一朝雲集又星羅要知訪古搜求盡應為凝香暇逸多
瀟洒高懷堪羨簿書堆案意如何

括蒼石門瀑布

宋戴復古

小泊石門觀瀑布明知是水却疑非亂拋雪玉從天下
散出雲烟到地飛夜聽蕭蕭洗塵夢風吹細細濕人衣
謝公蠟屐經行處聞有留題在翠微

簡李桐廬

宋方岳

媿面何堪見客星移舟且莫近前汀鷗沙草長連江暗

蟹舍潮回帶雨腥歸去尚餘初繭栗生來能費幾簞箸
詩腸一夜生芒角試問故人雙玉鉗

孤山

宋鄭震

又冒晴絲向水涯寒雲冉冉護巾紗能知綠鬢幾回至
欲作黃冠此處家已把掖垣等茅舍不愁封禪對梅花
晚風吹袂過船去看鶴上天衝碧霞

葢山戒珠寺

寺王右軍故居也

宋高翥

葉葉東風吹客衣昌安寺裏晚游時欹斜竹屋羲之宅

磨滅經幢率府碑佛化是誰留實相鵝亡猶自見方池
逢僧小作煎茶供略問源流笑不知

蘭亭

宋 高 菊

老來渾不愛春游來對蘭亭爛漫秋亭下水飛當日曲
山前竹似舊時脩二三客子因懷古八百餘年續勝流
試與山靈論往事不知還肯點頭不

同陳明叔游湖作

宋 朱南杰

四月湖邊冷若秋先賢堂下繫扁舟山頭積翠來新意

波面飄紅憶舊遊無奈楊花欺倦客已多荷葉護輕鷗
堤邊誰道春歸了猶有一聲黃栗留

東天目二首

并序

宋施樞

三潭之下有九溪之隔三潭之上有百丈瀑泉之勝
飛橋之險探涉攀緣止到第三池上兩池及飛橋則
無計可觀所以限仙凡也又有東西二井石室朝陽
三洞黃冠厭人游覽不肯引指僅披荆莽題名朝陽
洞中

不辭巖險訪龍潭潭底無窮碧似藍
亂石鳴灘溪過九飛泉瀉瀑壑分三
雖然道士能相引不比樵人得盡諳
惆悵飛橋無路到乘風應許御雲驂

不謂山行得此晴有名勝處必須經
玉田草滿春無極石竇人稀夜不扃
自料俗情應厭倦誰知幽意在空冥
碧桃却似傳消息一曲瓊歌月滿庭

西天目

宋施樞

茗水之源出此山地如邾魯始躋攀
三池浚澤高岡上

一勺為霖反掌間，著脚不知蒼漢近。
無心直共白雲閒，何時結屋枕泉玉。
滌盡塵根學大還。

重游大滌洞天

宋張蘊

澗水泠泠石髮新，松花香靚翠崖深。
雲生不沒仙人跡，丹化猶啼搗藥禽。
洗眼人多求聖水，醒心吾獨愛清音。
杖藜更欲過新洞，無奈春風又作霖。

贈天目吳君實

宋林景熙

詩興翩翩度雪溪，巖雲猶護舊留題。
夢回殘月蒼梧曉。

家在春風秀麥西
萱草堂深衣屨寄
桃花觀冷酒重攜
故山石鏡無人問
空與寒猿照影啼

括城

宋
林景熙

寒芒曾動少微星
一水溶溶疊嶂橫
落日漁舟吹遠笛
斷烟戍屋帶荒城
沙鷗欲近如招隱
闕樹無多亦厭兵
却憶鶯花亭下路
太平簫鼓沸春聲

重遊鏡曲次韻

宋
林景熙

青眼重逢白髮新
舊游却恐是前身
野鳩妬客招呼雨

江燕隨人管領春，曾附仙舟追李郭。
獨提詩律繼黃陳，鏡中恨不移家住。
山水蒼蒼老釣綸。

西湖圖

宋真山民

兩袖春風一丈池，等閒踏破柳橋西。
雲開遠嶂碧千疊，雨過桃花紅半溪。
青旂有情邀我醉，黃鶯無恨為誰啼。
東風正在桃林外，多少遊人逐馬蹄。

泊舟嚴灘

宋真山民

天色微茫入暝鐘，嚴陵灘上繫孤篷。
水禽與我共明月。

蘆葉同誰吟晚風隔浦人家漁火外滿江愁思笛聲中
雲閒休望飛鴻影身即天涯一斷鴻

永嘉秋夕

宋真山民

風戰枯桐敲紙窗擁衾無寐夜偏長
譙樓三鼓夜將午雲雁數聲天正霜
寓世此身驚逆旅寬懷何處不吾鄉
江頭風景日堪醉酒美蟹肥橙橘香

浙江通志卷二百七十五

欽定四庫全書

浙江通志卷二百七十六

藝文

十八

詩 七言律

杭州拱北樓

元 趙孟頫

城上高樓接太霞
令嚴鐘鼓靜無譁
提封內向三千里
比屋同封百萬家
心在江湖存魏闕
身隨牛斗泛仙槎
舉頭便覺長安近
時倚闌干望日華

弁山佑聖宮次孟君復韵

元趙孟頫

意行騎馬到林間
晴霧都沈遠
近山瓊樹著花春
自早
翠禽雙語意相關
一杯到手先成醉
萬事無心觸處閒
猶欠抱琴來托宿
靜中規寫水潺潺

德清閒居

元趙孟頫

已無新夢到清都
空有高情與隱居
貧尚典衣貪購畫
病思棄研厭求書
園人焚積夜防虎
谿女叩扉朝賣魚
困即枕書飢即飯
謀生自笑一何疎

同楊心卿過孤山訪靜傳不遇自遊和靖祠下明

日奉寄二高士

元仇遠

飛仙入向別峰遊竹下閒房且小留滿鬢朔風吹客帽
倚欄落日在漁舟梅花路冷難尋冢葑草田荒半作洲
獨往獨來沙鳥怪山空木落使人愁

秋日西湖園亭

元仇遠

西湖一曲百泉通漠漠青山遶梵宮故國園林秋色淨
明朝風雨桂花空銀笙玉笛清歌外畫舫珠簾落照中

人物風光兩相稱
兒童遮莫笑山翁

越州道中

元熊鉉

野田秋溜正潺潺
新翠喬林繞舍環
淡日凝烟橫別浦
斜風吹雨過前山
柴扉初放牛羊出
漁艇方攜蟹蛤還
自笑平生愛游覽
天教長在水雲間

桐江舟中

元尹廷高

人搖柔櫓下嚴灘
一片離情強自寬
鴉噪暮雲天寂寂
鴈歸極浦水漫漫
敲蓬雪霰和愁碎
拍枕江聲入夢寒

今夜客帆何處宿亂山青外是長安

送人赴浙東木綿提舉

元程鉅夫

曾歷金華三洞天風流歷歷記山川
柏林白綻梅花小柿實紅垂橘彈圓
訪古但聞羊化石因君又喜木生綿
霜風渾似當時峭愁絕雙溪八韻篇

送戴道士住天台

元程鉅夫

君承恩命住天台萬壑千峰繞絳臺
門外霞川浮漠渚杯中雲海接蓬萊
時同野鶴看桃去或領山猿採藥迴

三十年前吾亦到舊題應入白雲堆

蕪堤秋宴

元 元 淮

南北高峰鎖翠雲山藏樓閣帶烟輕欲彫楊柳猶貪舞
半破芙蓉未老成波底畫橋天上動湖邊珠翠鏡中行
水晶萬頃浮波面照出孤山分外清

和繼學郎中送友歸越中

元 馬祖常

蘭門東望海無波誰許山人問薜蘿雀舫春聲留水鷺
鷗袍秋影動天鵝鑑湖草滿芙蓉少鄞縣潮來牡蠣多

羞見京塵遮帽頂羊裘亦欲換漁蓑

游西湖

元
曹伯啓

鬱鬱羈愁暑不堪畫船西出事奇探柳邊和氣蘇公路
梅底清風處士菴已覺湖山入胃臆更容絲竹薦肥甘
錦雲一段三千頃記取平生作盛談

遊靈隱

元
曹伯啓

岩堯鷲嶺梵王城秋氣平分寶界清火宅久居心獨苦
雲林初識眼增明禪關已被猿叅透仙洞誰教鬼鑿成

漸負半生泉石約
暫來偷暇洗塵纓

送韓伯高僉憲湖西

元虞集

正月樓船過大江
海風吹雨灑船窗
雲消虹蜺橫山閣
潮落黿鼉避石矸
闕下諫書誰第一
濟南名士舊無雙
湖陰暑退多魚鳥
應勝愁吟對怒瀾

錢塘懷古二首

元楊載

斜界鈎陳通大道
中分魏闕對層巒
雲生殿上金鑪暗
露下庭前玉井寒
江漢飛龍俄宿宿
滄漠泛鷁竟漫漫

中天會合寧非數坐見蒼生奠枕安

山回禁籞入雲長無復陳兵衛兩廂千古金鐘埋野草
萬年珠樹落秋霜龍文不徙陽人聚烏篆終降軹道旁
九市緇塵來袞袞一江波浪去茫茫

題拱北樓

元楊載

殷地鼓鼙迎日出倚天梁棟與雲浮北瞻帝闕三千里
南控臣藩二百州江海無波沉罔象旌旗乘野駐貔貅
鸞迴麗榜多深意繡袞於今有魏牟

暮春遊西湖北山

元 楊 載

愁耳偏工著雨聲，好懷長恐負山行。
未辭花事駸駸盛，正喜湖光淡淡晴。
倦憇客猶勤訪寺，幽棲吾欲厭歸城。
綠疇桑麥盤櫻筍，因憶離家恰歲更。

游天竺寺

元 白 珽

山轉龍泓一徑深，嵐煙吹潤撲衣巾。
松蘿掩映似無路，猿鳥往來如有人。
講石尚存天寶字，御梅嘗識建炎春。
城中遮日空西望，自與長安隔兩塵。

游智者寺

元
鮮于樞

四圍松是祇園樹三面山開舍衛城
游子心隨仙境化老禪詩似石泉清
幾人邂逅有今日半載趑趄成此行
安得盡拋身外事長年來此學無生

送人游天台

元
鄧文原

此去蘭亭修禊後平明驅馬試征衣
海邊山盡天無盡花底春歸人未歸
一雨潮生魚入市遠巖月上鶴投扉
舊游二十年前路孤負東風賦采薇

三月晦游道場山宿清公房與成父同行二首

元
鄧文原

絕頂軒窗納晚晡下方燈火聽鐘魚
天連震澤涵元氣地涌浮圖切太虛
涼立松風觀石溜晚尋樵徑扣僧廬
孤亭山麓荒苔積猶想幽人夜讀書

澗石縈紆紫竹叢晴雲吹落水晶宮
夜寒身宿羣峰頂花盡春歸萬木中
儻買山田營破屋時過僧寺駕孤蓬
只應渺渺軒前路杖履長陪鶴髮翁

次陳輔賢游雁山韻

元 李孝光

竹杖撥蹊去去賒一春紅到杜鵑花
山椒雨暗蛇如樹石屋春深燕作家
老父行尋靈運屐道人喚喫趙州茶
明朝塵土芙蓉路猶憶山僧飯一麻

入雁蕩山

元 李孝光

興國年間路始開前朝碑墨半蒼苔
雁橫宥月知秋到僧踏湫雲看瀑來
一嶺未教靈運識萬松誰道了翁栽
此山曾共秋風約說與山猿不用猜

賦得越山越水

元 李孝光

賀家湖上又秋風，放翁宅前東復東。
兩行雲樹忽遠近，十里荷花能白紅。
游人濯足銀河上，越女梳頭青鏡中。
我欲張帆上南斗，扶桑碧海與天通。

題雪竇妙高臺

元 黃潛

偶為清游宿梵宮，凌晨試上最高峰。
水翻雪色寒猶落，雲掩丹光遠更重。
舊有一僧能跨虎，近聞三洞盡藏龍。
下方車馬應難到，煙際惟聞日暮鐘。

次韻方子踐浙江觀潮

元黃潛

潮生潮落幾時休
朝暮吳兒幾白頭
被髮祇誇迎駭浪
側身寧解障奔流
江吹碧瓦人聲曉
雲閃朱旗海氣秋
後夜月明天在水
有誰能此賦登樓

諸暨休日偶書

元黃潛

一室蕭然似冷官
更無車馬駐江干
天清不斷絲絲雨
春淺猶生陣陣寒
公事痴兒何日了
雲山圖畫要人看
輕風正滿新黃柳
誰與相從試凭欄

送王正臣經歷赴浙東

元柳貫

仙掌浮空紫翠重，金華秀出浙河東。
繡衣幕府雲霄上，丹筆刑書雨露中。
溪釀獨稱雙醞美，津船纔許一帆通。
送君因寄思鄉夢，為問青山舊桂叢。

送葉道士歸天台

元柳貫

北斗光中曳翠旂，五城樓觀極巍巍。
采山不鑄黃金鼎，佩印空垂白羽衣。
石井劍花飛夜氣，玉田芝草豔春暉。
天台仙子應招隱，萬壑梯飈看鶴歸。

浦陽十詠

元柳貫

冰柱浮空曉色蒙海波搖動玉璫瓏九清內景游紛外
五嶽真形太素中微月升壇初映鶴長雲連野不驚鴻
仙姬晏坐瑤池上催捧蟠桃獻木公

仙華巖雪

白石靈山望贊皇湫潭此復見蒼蒼飄揚直欲陵三際
膚寸猶能雨八荒空外金精縣太白泉中虬彩化長黃
傳芭奏罷神絃曲松蓋成陰澤氣涼

白石湫雲

兩環日月似飛梭
鼇背稜稜宰堵坡
朱鳥前頭森鼎鬲

蒼龍左角見嵯峨玉函舍利朝光現珠斗闌干午影過

浩蕩浮雲開萬象寶華離還散芬陀

龍峰孤墀

一勺曹谿未是甘刺山容易出飛泉消融太古岷峨雪

澄映中秋沆瀣天挂樹青猿窺洗鉢眠沙白鹿伴安禪

巖龕無縫身如石逆數高僧入定年

寶掌冷泉

有盈有泚即寒泉猶隔蘆峰道里千嶽麓雲深藏策處

匡山人老讀書年松楠疊影青浮几華樹生香晚入筵

稽首堂中兩夫子六經言遠視如天

月泉春誦

溪水添流到石砭，小家殘戶占漁商。
蛟龍未解乘雲氣，魚鼈安能避澤梁。
兩岬櫟林藏曲折，一篝松火照微茫。
誰夸固有蠙珠顆，往往鉤深得夜光。

潮溪夜漁

千峰不盡夕陽孤，歛翠浮舟入畫圖。
塢廟傍連山影直，石梁中互水痕枯。
白魚在汕將踰尺，紅稻登場稍似珠。
玉露金風秋最爽，跳身何用市間壺。

南江夕照

半里官橋出市闌，一團秋色破孱顏。
雲開浩蕩初疑曙，日出蒼涼不見山。
斷雁殘鴻飛杳杳，綠蕪紅葉映斑斑。

去年菊蕊今年發拾得籬邊句子還

東嶺秋陰

濫觴初不滿瓶盆百谷渾渾一壑吞自此安流輸渤澥
放渠高浪蹴崑崙出山未適帆檣便竭澤毋庸罔罟繁
謝客題詩曾宿處孤雲落日是何邨

深衷江源

芝掌中開顯氣青雲駟雙駕鳳凰翎因山不啓軒轅鼎
化石猶聯婺女星磴道芳春琪樹長巖扉清畫碧華零
真仙帝遣司風雨喚起淵龍聽指令

昭靈仙迹

游五洩山二首

元柳貫

神斧誰攜鑿澗磻拓開地險出天慳湫潭隱與龍非畜
太石陰森鬼所震劫火塵空遺井白枯禪骨冷墮榛菅
如何大法臨標季不放摩尼照此山

青天吹墮玉芙蓉日出烟開彩翠重嫠女名山今入越
泐潭弟子別為宗於何勝境偏多阻如此衰年始一逢
照影龍泓余種種欲從老衲借枝筇

三衢馬太守昂夫索題爛柯山石橋

元
薩天錫

洞口龍眠紫氣多登臨聊和采芝歌
爛柯仙子何年去
鞭石神人此地過
烏鵲橫空秋有影
銀河垂地水無波
遙知題柱凌雲客
天近應聞織女梭

吳宗師赤城阻雨次甘泉韻

元陳旅

三十六盤唬杜鵑
杜鵑唬盡到平川
千山白雨作秋氣
六月赤城堪晝眠
銀渚星槎留使客
竹宮風帳候神仙
衰予病起橋門下
目送晴雲度楚天

題嘉興水西寺夷溪樓寄新仲銘長

元
成廷珪

新公邀作壘溪游為說前朝有此樓雲氣遠開天北極
風光仍在水西頭虛檐古瓦緣蒼鼠曲澗輕波漾白鷗
宸翰僅留飛白在煙塵漠漠使人愁

自山中歸鏡湖別業

元
吳景奎

數椽茅舍清江曲六月炎天困鬱蒸賴有青山圍故宅
歸來赤腳蹋層冰石泉松籟為琴筑野蕺山肴薦豆登
明日迴頭望邱壑芙蓉半出白雲層

新山別館十景

并序

元曹文晦

余家東北麓作考妣祠堂題曰新山別館直赤城之陽烏岡之右隴勢北走而中斷屋臨山北繚以修垣牽連岡隴前挺高竹後列羣松上下襟還蒼翠如織東偏為門登石版涉隴上旁通支逕彎環花竹間入館中西翼小亭坐可五六人有員嶠却立其前樹氣清郁禽語瀏亮皆若效竒以出映帶後先余以耳目所接次其景物性情所得發為韻語雖不足以鼓吹

夙雅然必著之篇什者志吾樂也至正庚寅夏日

數點殘星掛綠蘿看桃行入舊山阿洞門花霧紅成陣
沙麓巖前翠作窩天外曙虹驚鶴夢水邊啼鳥和漁歌
劉郎去後無人到吟倚東風草色多

桃源春曉

赤城霞起建高標萬丈紅光映碧寥美人不卷錦繡段
仙翁瀉下丹砂瓢氣連海嶼貫旭日光入溪甕生春潮
我欲結為五色佩碧桃花下呼周喬

赤城棲霞

拄峰堂下翠紛紛俯鑒澄源氣自芬雨澗合流元有緒

八風吹水自成文
沄沄尚想在川上
混混終當放海濱
欲舉源頭問寒拾
幽亭盡日對松雲

雙澗觀瀾

四萬八千山上山
山中夜夜白雲還
底須出岫彌六合
日復與僧分半間
古殿結陰燈影澹
長松留暝寺門關
謫仙已覽廬山秀
留得書堂相對閒

華頂歸雲

舊日溪源浸巨螺
一竿來此老漁蓑
遠尋短櫂輕舟興
高唱斜風細雨歌
夜泊松潭明月近
晝眠花港綠陰多
朝朝老瓦盆邊醉
冷看王孫細馬馱

螺溪釣艇

清溪溪口荻花秋底事年年伴白鷗北去不辭書帛寄
南來非為稻梁謀荒煙渺渺長橋外落葉蕭蕭古渡頭
見說洞庭風月好碧波千頃少漁舟

清溪落鴈

觀彼南山小衆山霜明紅樹碧雲寒餘清入座挹不盡
積翠浮空染未乾漠漠祇愁晴霧隔霏霏休待夕陽看
何人會得悠然趣前有陶公後有韓

南山秋色

萬仞臺端接絳霄秋風吹夢度金橋素娥獨倚白銀闕
羽客雙吹紫玉簫清氣逼人凡骨換孤光入酒醉魂消

繡襦甲帳今何在誰為文生一見招

瓊臺夜月

山北山南盡白雲雲中有水接天津
兩龍爭壑那知夜一石橫空不度人
潭底怒雷生雨雹松頭飛霧濕衣巾
雲華亭上茶初試一滴曹溪恐未真

石梁雪瀑

巖戶陰森隔萬松暮雲卷盡寺林空
天邊漸蝕千峰紫木杪猶餘一縷紅
兩箇歸僧開竹院數聲殘磬度溪風
憑誰喚起寒山子共看迴光入梵宮

寒巖夕照

越山清曉

元

貢性之

曙光晴散越王臺萬壑千巖錦繡開欹枕僧鐘雲外落
卷簾漁唱鏡中來樹藏茅屋雞聲斷露濕松巢鶴夢回
安得畫圖分隙地移家仍住小蓬萊

富陽舟中

元金涓

終日推篷對酒杯漁郎隔浦櫂歌回路傍古屋無人住
山下疎梅獨自開幾處汀洲分鴈下滿江風雨送潮來
白頭篙叟休相促明日天晴上釣臺

送友人游溫台

元釋宗衍

天台鴈宕好林丘水竹風杉寺寺幽路轉山腰斜避石
渠通泉眼細分流經過遂欲留佳處險絕何須到上頭
八月錢塘望歸櫂江潮如雪倚江樓

上巳日游平湖

元張宇

微風漠漠水增波禊事重修繼永和脆管當筵清似語
扁舟爭舫疾如梭一時人物成高會千里雲山入浩歌
日暮芝蘭無處覓野花汀草占春多

送李教授之湖州

元柯九思

水精宮裏尋春處
天目山前看月時
隔岼園亭俱可愛
舊時風物未全衰
廣文游宦詩如錦
博士淹留鬢欲絲
欲謝君恩無寸補
他年杜牧去應遲

岳王廟

元
林泉生

岳王墳上褒忠寺
地老天荒恨尚存
介冑何堪投獄吏
衣冠無復望中原
青山能掩萋弘血
落日空悲蜀帝魂
遼鶴不歸人事別
吳宮青草又黃昏

題高節書院

元
伊埒布哈

遠聘羊裘到漢庭竟忘龍袞略儀刑先生不為千人爵
太史何勞奏客星潮上巖灘浮海白山連禹穴入雲青
高風千古成陳迹唯有荒祠繞翠屏

送復見心住定水

元
宇文公諒

定水招提鳴鶴東鑑湖歸去泛孤篷鉢衣不濕荷花露
玉塵遙生桂子風山靜祇看雲自動江澄莫訝水如空
沃洲有約尋支遁還許清談共野翁

登子胥廟因觀錢塘江湖

元
方行

吳越中分兩岫開，怒濤千古響奔雷。
胥胥不作忠臣死，句踐終非伯主材。
歲月消磨人自老，江山壯麗我重來。
鴟夷鐵箭俱安在，目斷洪波萬里回。

題岳武穆王墳

元 潘 純

湖水春來自綠波，空林人迹少經過。
夜寒石馬嘶風雨，日落山精泣薜蘿。
江左長城空自壞，鄴中明月竟誰歌。
惟餘滿地長弘血，草色年深碧更多。

越溪

元 鄭 東

三月雨晴天氣新老夫起整紫綸巾
岼花紅白遠迎棹
江燕去來低傍人冷面誰能憎俗子
好山吾得作比鄰
明時獨媿才卑拙老大猶為江海臣

送果上人游鴈山

元鄭采

雪消山色漲東州最好天台鴈蕩遊
背負青天緣鳥道
面承飛雨看龍湫深春林麓多金剝
落日江湖自白頭
石上玉芝應拾得念吾無物可銷愁

桐江懷古

元何景福

合江亭下買舟行
擊楫中流萬古情
嚴子臺高烟樹暗
桐君塢暎浪花明
英雄不並青山在
時事還隨紅日生
我欲遠尋方外訣
白雲深處石橋橫

渡錢塘江

元周槩

日出長江烟霧開
越山吳樹抱江迴
霸圖蹤跡空今古
天塹東南有劫灰
山郭雨昏雲似墨
海門潮急浪如雷
舟師省柁須看客
不數瞿塘滯瀕堆

憶會稽

元張翥

千巖秋色徹層霄憶昔來乘使者輶翠袖屢扶蓬閣醉
籃輿時赴寶林招山陰客已無春會溪上風猶送暮樵
此恨古今消不盡西陵寂寞又回潮

憶吳興

元張翥

憶汎苕華溪上船故人為我重留連半山塢寺藏雲樹
繞郭樓臺住水天白榜載歌明月裏青帘沽酒畫橋邊
計籌山下先塋在欲往澆松定幾年

述慈溪景

元張翥

往年使過慈湖上風景依稀可畫傳紅葉樹藏秋水寺
白頭僧渡夕陽船竹林雨過山多筍漁浦潮來海有鮮
藉爾遠公能愛客不妨酬倡酒尊前

浦陽十景

元 吳 萊

手倚晨扃一渺漫山神擁出玉巔岼光侵道者祠星室
跡破樵家斲藥壇石筍撐空穿宿暝天機織素挂餘寒
俄然喚醒西南夢怕作松州徼外看

仙華巖雪

獨上南山最上頭朝躋一點便成湫巖腰動石風初起

海眼輸泉雨欲流
蜥蜴含珠光照夜
靈霞卷鐵黑沉秋
明當去挾騎龍叟
直到扶桑第九洲

白石湫雲

老眼前頭尺五天
真龍角上正攀緣
規撫白馬馱經過
想像玄鰻護塔眠
梵唄將回知磬絕
神珠欲隕見燈懸
何妨宴坐初禪界
蟻蠓紛飛即大千

龍峰孤塔

乍撥山亭木葉堆
老僧千歲啜巖開
天從白石雲根出
地帶青泥雪髓來
竹影自深斜映月
魚腥不到半凝苔
世間夢渴知多少
可待金莖露一杯

寶掌冷泉

古木叢中息世喧
老生力學掩溪門
危絃未絕人須聽
蠹簡多忘我欲溫
白兔流光分石色
蒼龍擁沫驗沙痕
從今更浚源頭水
莫待投膠與救渾

月泉春誦

昨夜寒潮與此通
荒溪尚趁百川東
行依柏樹林頭月
釣拂蘆花嶼畔風
插竹侵沙魚尾短
篝燈映草蟹罍空
太公遠矣吾將隱
赤鯉何書在腹中

潮溪夜漁

偶出官橋倚落曛
詩家觸景謾紛紛
彈琴在峽驚聞瀑
卷畫為溪喜得雲
竹篠晚深樵弛擔
莎根秋短牧歸羣

道旁更有粉榆社欲脫蓑衣藉酒醺

南江夕照

幾點晴雲著樹梢寒山蒼莽類城壕雞豚日落聲相接
鶴鶴風涼勢自高小徑殘榛分嶺脊平疇淨綠帶溪毛
朝來雨足多秋意井上無人事桔槔

東嶺秋陰

半遶山根但一窪真源鑿破杳無涯清澄灌或於陵圃
窈窕尋猶博望槎積雨衝隄蝸自國微煙幕渚鷺專沙
欲行復坐皆雲水只屬騷人與釣家

深裏江源

一掌嵯峨是玉京連峰欲向禺湖傾高張黼座龍隨下

靜擁珠輶虎獨行
白雪松扉雙立影
清風藥井倒吹聲
長歌為問西王母
却把荷花與送迎

昭靈仙跡

游三天洞

元
吳師道

稽亭山下三天洞
憶我金華物色同
拔地飛崖雲洶湧
映空嵌穴樹蔥蘢
不知混沌何年鑿
直恐神仙有路通
終擬赤松歸隱去
清游還墮夢魂中

送范德輝赴緡雲教諭兼簡高則誠

元
陳基

不逐扁舟汎五湖一官迢遞縉雲墟遺民世守軒轅鼎
博士家傳魏國書夜月定聞鄰縣鶴秋風莫憶故鄉魚
到州為謝高書記日日相思賦索居

遊開元寺憇綠陰堂

元
楊維禎

韋郎句中尋畫寂劫灰不盡綠層層鴻文重記青城客
內典新傳瀑布僧石佛浮江輕似葉神珠照鉢隱如燈
杪擢樹子風前落吹滿思公舊毘毘

送錢思復之永嘉山長

元
楊維禎

湖頭送客綵舟移青雀飛來花滿枝
進士舊傳羅剎賦
佳人新唱竹枝詞
黃桐錦樹秋風早
青巖江雲海日遲
思遠樓前約相見
西山煙雨畫新眉

錢塘懷古率堵無傲同賦

元
楊維禎

天山乳鳳飛來小
南渡衣冠又六朝
劫火自焚楊璉塔
箭峰猶抵伍胥潮
燐光夜附山精出
蜃氣秋隨海霧消
惟有宮人斜畔月
多情還自照吹簫

湖州作

元
楊維禎

三月三日雨新晴相邀春伴冶西城即倩山妻紗帽辦
更煩小婢犢車輕好語啼春泰吉了仙姿當酒董雙成
憑君多唱嬉春曲老子江南最有情

五十狂夫心尚孩不受俗物相填𦏧興來自控玉蹄馬
醉後不辭金當杯海燕來時芹葉小野鶯啼處菜花開
春山已備紅油蓋不怕城南小雨催

長城小姬如小憐紅絲新上琵琶絃可人座上三株樹
美酒沙頭雙玉船小洞桃花落香屑大隄楊柳掃晴烟

明朝紗帽青藜杖更訪東林十八仙

湖州野客似元真水晶宮中烏角巾得句時過張外史
學書不讓管夫人棋尋東老林中搗飯煮西施廟下莼
無雨無風二三月道人將客正嬉春

西湖

元
楊維禎

西湖風景開圖畫墨客騷人入咏嗟扇底魚龍吹日影
鏡中鶯燕老年華蘇堤物換前朝柳葛嶺人耕故相家
今古消沉一杯水兩峰長照夕陽斜

湖上漫興

元張昱

百鎰黃金一笑輕少年買得是狂名尊中酒釀湖波綠
席上人歌鳳語清蛺蝶畫羅宮樣扇珊瑚小柱教坊箏
南朝舊俗憐輕薄每到花時別有情

湖上新泥雪漸融門前溝水暗相通裙欺萱草輕盈綠
粉學櫻桃淺淡紅暮雨欲來銀燭上春寒猶在酒尊空
青綾被薄不成夢又是一番花信風

湖樓

元張昱

樓前芳草碧盈盈付與幽禽自在鳴隄上馬馱紅粉過
湖中人載畫船行日長燕子語偏好風暖揚花體又輕
何限才情被花惱獨教書記得狂名

西湖漫興

元張昱

玉局當年為寫真西施宜笑復宜顰朝雲暮雨空前夢
桃葉柳枝如故人露電光陰千劫外魚龍波浪一番新
傷心最是林逋宅半畝殘梅共晚春

送杭州謝總管

元倪瓚

南省迢遙阻北京張公開府任豪英守臣視爵等侯伯
僕射親民如父兄錢廟有碑刻夜雨岳墳無樹著秋聲
好將飲食濡饑渴何待三年報政成

正月十六日游湖上

元 錢惟善

東風杖屨偶相從試傍新隄覓舊蹤花竹園池通一徑
金銀樓閣倚千峰林煙日午青先暝湖水天寒綠未濃
賣酒壚頭人似玉抱琴時復醉臨邛

寄餘姚滑伯仁

元 丁鶴年

獨木橋邊薜荔門，全家移住水雲村。
猿聲專夜丹山靜，蜃氣橫秋碧海昏。
詩卷自書新甲子，藥壺別貯小乾坤。
陶漁耕稼遺風在，差勝桃源長子孫。

寄西湖林一貞

元
丁鶴年

錦繡湖山世絕稀，東風不放賞心違。
芙蓉楊柳臨清淺，佛剎仙宮繞翠微。
畫舫載春天上坐，紫騮馱醉月中歸。
高情獨有林和靖，門掩晴空看鶴飛。

題前餘姚州判官葉敬常海隄遺卷

元 阿里沙

潮汐東來勢蹴天一隄橫捍萬家金陵遷谷變人誰在
海晏河清事獨賢曉日山川神禹跡秋風禾黍有虞田
河渠他日書成績應並宣房與代傳

越中言懷

元 馬臻

分甘茅屋老蒼苔不是明時棄不才避社燕歸楊柳合
趁墟人散鷺鷥來半江落日明漁浦兩岼回潮掠釣臺
吳越爭雄俱一夢年年杜若滿汀開

浙江晚眺

元馬臻

昔年吳越事并吞，留得青山只斷魂。
落日正明漁浦渡，歸鴉遙點范家村。
雲分雨脚回沙溆，帆趁潮頭出海門。
欲問淒涼千古意，鴟夷何處有兒孫。

西湖放燈

元張雨

共泛蘭舟燈火闌，不知風露濕青冥。
如今池底休鋪錦，此日槎頭直掛星。
爛若金蓮分夜炬，空於雲母隔秋屏。
却憐牛渚清狂甚，便欲燃犀走百靈。

次韻段推官觀潮

元張雨

雪濤卷入白螺杯，雲夢吞將灩澦堆。
陣馬直從天漢落，颶風先自海門來。
青山一向開銀壁，黃縵中央立露臺。
好在畫圖留壯觀，江頭白首不堪迴。

和率性大滌諸詠

元張雨

石色斑斑野鹿胎，石身渾裹夜明苔。
直將瑞氣穿龍洞，不比游塵汙馬嵬。
巖下松枝同不朽，月中鶴駕合頻來。
君看怪石英雄坐，寂寞於今臥草萊。

雲根石

第幾峰前蒼玉洞何年於此凰求凰
梧枝宿久毛皆變
竹實餐多髓亦香
露濕紫苔春似錦
月明丹穴夜生光
我亦鵷行舊儔侶
雲中有路共回翔

鳳洞

誰見蒼龍劈石開
此峰元自勝飛來
闌干截斷山頭雨
巖巖翻將地底雷
寒甚祇疑雲是雪
霜餘每恨葉成堆
坡仙獨對無言說
慚愧搜詩日幾回

翠蛟亭

涵淳萬象一泓中
欲探靈源未易窮
丹竈久埋泉眼赤
珊瑚長浸石頭紅
評來水味羞揚子
收拾砂牀贈葛洪

一醉流霞三萬日年年分給羽人宮

丹泉

夏晚泛湖

元厲英

楊柳陰中艤小船
芰荷香裏聳吟肩
雷聲驚起雲頭雨
塔影倒搖波底天
羣鷺遠明殘照外
一僧閒立斷橋邊
菱歌裊裊知何處
滿袖清風欲欲仙

靈峰寺棲雲樓

明劉基

靈峰之中樓倚山
山雲日夕棲其間
九霄雨露隨高下
六月風雷送往還
青嶂曉光浮藻梲
銀河夜氣濕松關

天台向上無多路
鶯嶺烟霞此可攀

題水簾洞

明宋 濂

石泉飛雨亂淋漓
翠箔銀絲萬縷齊
雲屋潤含珠網密
月鈎涼沁玉繩低
鮫人夜織啼痕濕
湘女晨粧望眼迷
恍似水晶宮殿裏
四簷花雨亂鶯啼

送愚上人歸越并簡奎方舟長老

明

貝

瓊

天界歸來亦已遲
庭松此日定回枝
山中結社無靈運
海上留衣有退之
鶴去雲霄隨錫杖
龍收風雨入軍持

西湖若見方舟老為說三山夢裏詩

送翁鎮方歸天台

明
貝瓊

雲氣空濛是赤城高歌歸去不勝情
天傾滄海東南迴地接丹邱日月明
念我好將黃獨寄知君先向石橋行
春風一路啼鶯鳥定有花間窈窕迎

錢塘春日

明
貝瓊

三月皇州望欲迷
湧金門外草初齊
滿山雲氣不見日
一雨天街都作泥
溫室樹高鸚鵡去
玉津花落杜鵑啼

斷橋何日重攜酒醉和兒童唱大堤

浙江亭觀潮

明
貝瓊

山摧坼坼晝冥冥動地西風帶蜃腥
滄海倒流吞日月
青天中裂走雷霆欲招白馬今無跡
莫信神魚尚有靈
一氣虛空自升降乾坤與我亦浮萍

湖州道中

明
韓奕

百里溪流見底清
荇花蘋葉雨新晴
南潯賈客舟中市
西塞人家水上耕
坼轉青山紅樹近
湖搖碧浪白鷗明

擢歌誰唱彎彎月彷彿吳儂子夜聲

雪溪翁山居圖

明楊彝

門前野水可通漁雲裏草樓方著書好山誰臨北苑畫
斷橋我憶西湖居塵埃自著鷗鷺外霜露正當鴻雁初
為報秋風搖落蚤梅花消息近何如

桐君山

明朱希晦

仙馭乘鸞去不停青山依舊抱荒城風香藥草春雲暖
露冷桐花夜月明縣近故廬堪認姓鶴歸華表自呼名

千年往事俱塵土時聽樵林吹笛聲

苕溪耕隱

明 郭 完

苕溪環翠入瓢湖古木雲莊即舊居每種秫田秋釀酒
剩收桐子夜觀書雪晴度嶺閒騎犢客至沿溪旋打魚
老我塵中無隱處借君餘地著茆廬

寄海昌李使君

明 高 啓

海上波濤夜不驚使君雖老尚能兵荒烟白鹵家家竈
落日黃茆處處營人雜島夷爭小市潮隨山雨入孤城

明朝硤石山頭路我欲停車聽頌聲

和謝雪坡錢塘見寄

明 楊 基

經句不見謝宣城小楷烏絲寄遠情黃篋樓高春夢破
綠蘿衣薄暮寒生鶴臨沙渚鷗俱浴花落江泥燕與爭
亦欲雨蓑搖短楫西湖新水蕩空明

送蓮社陸道師歸鏡湖別業

明 張 羽

一錫橫飛下鏡湖頭顱老去世緣疎庭栽竹少堪容鶴
池種蓮多不礙魚滿室香雲經盡後半窗明月定回初

陶潛懶入東林社在在青山可結廬

次韻蕭山友人

明王禕

長憶蕭然山下縣去秋為客日招邀
夕陽元度飛輪塔
曉雨文通夢筆橋
搜檢蟲魚窮爾雅
咏歌草木續離騷
舊游回首成凋謝
莫遣音書似路遙

錢塘

明朱夢炎

萬戶烟銷一鏡空
水光山色畫圖中
瓊樓燕子家家酒
錦浪桃花岼岼風
畫舫舞衣回暮景
繡簾歌扇露春紅

蘇公堤上垂楊柳尚想重來試玉驄

吳越山川勝槩多綠雲樓觀鬱嵯峨晴嵐日照芙蓉影
細柳風生翡翠波楚客移舟時見問吳姬抱瑟肯相過
片帆明日江東去尚憶樽前對酒歌

送勤上人歸靈鷲山

明張紳

靈鷲禪房我所思可憐春晚送勤師亂山啼鳥烟霞裏
一路落花風雨時定有猿看窻外果應知苔護壁間詩
門前有徑通三竺欲向中天採石芝

次韻夏大卿寄瑪瑙寺獻上人

明 鎰 泰

高僧占斷西湖勝，細草斜連石子坡。
度嶺剪來藤作杖，翻畦種得菜成窠。
一龕曉日紅蒸衲，四壁秋煙翠染羅。
借問何時開夜講，洗清塵耳定須過。

鏡川

明 楊 範

斜日一輪山上頭，輕霞片片漾波流。
平蕪野岬碧千畝，喬木人家橫半樓。
沙鳥回翔將下宿，田夫被濯欲歸休。
漁舟各已收緡去，漸有燈明蘆荻洲。

西溪晚步

明張燦

空濶川原入望平，晚來天色弄陰晴。
虹邊殘雨疎疎下，鴉背斜陽閃閃明。
淺渚微波羣鷺浴，斷堤高柳一蟬鳴。
行吟澤畔非憔悴，漁父無勞詠濯纓。

寄杭東卿

明徐禎卿

西湖十月煙水平，梅花參差千樹明。
越王城畔氣應早，林逋宅邊江更清。
驛使章臺空寄別，霜天玉笛暗霑纓。
故人若有揚州興，為聽春鴻白雪聲。

送耿晦之守湖州

明 徐禎卿

遠下吳江向雪川，高秋風物倍澄鮮。
鵲巢菰葉翠相亂，錦石游鱗清可憐。
郵渚撾頻津吏鼓，漁歌唱近使君船。
吳興峴山足勝事，漢水襄陽空昔賢。

化城寺

明 王守仁

化城高處萬山深，樓閣憑空上界侵。
天外清秋度明月，人間微雨結輕陰。
鉢龍浮處雲生座，巖虎歸時風滿林。
最愛山僧能好事，夜堂燈火伴孤吟。

聞曰仁買田雪上攜同志待予歸

明

王守仁

見說相攜雪上耕連蓑應已出烏程荒畝初墾功須倍
秋熟雖微稅亦輕雨後湖舫兼學釣餉餘堤樹合閒行
山人久有歸農興猶向千峰夜度兵

嚴州道中

明

程敏政

山遠沙平水似烟蓬窗贏得枕書眠暖風一日初黃柳
好雨連宵賸綠田傍岸鳬鷺如送客隨家雞犬不驚船
相看便有江湖戀畊鑿娛親在幾年

永康

明文林

畫舸乘風入永康
疎花綠幄一溪長
山淘麥浪青重疊
雲霧魚鱗白渺茫
王事有程行作吏
勝遊無侶夢還鄉
直輸漁父蘆汀畔
斗酒渾家醉野航

雪晴同邦彥游西湖

明文林

雪後孤山共探梅
便乘清興不須催
林邊細路和橋斷
湖上疎花傍竹開
雲影分明披絮帽
蹄涔彷彿散銀杯
酒寬新量詩盈卷
不負凌寒此度來

登吳興慈感寺閣

明史鑑

亭亭高閣倚斜暉廿載曾從此地歸
往事已隨春草換重來似覺故人稀
孤城近水青山映遠樹和雲去鳥微
欲繫扁舟嗟未得蘼蕪新綠釣魚磯

昭慶寺看芍藥

明王渙

一半春光過牡丹又開芍藥遍禪關
久辜往約違蓮社今續清歡到寶欄
垂露幾團花面濕東風一陣燕泥寒
酒邊何味呈奇供綠筍朱櫻正滿盤

中秋同凌時東董子言陳用明西湖玩月

明
孫一元

十里蒹葭雨盡收
西湖一望月光浮
野袍白幘聞幽事
菰米蓮房作好秋
波靜龜龍聽醉語
夜涼河漢帶漁舟
高情盡在形骸外
不用逢人說勝遊

新卜南屏山居

明
孫一元

石上藤蘿對夕曛
解衣長日坐來頻
挽回滄海真無計
領畧青山合有人
養鶴似嫌雙口累
為漁又過一生身

相逢惟是南屏老獨樹柴門許結隣

秋夜坐吳山僧舍

明孫一元

夕陽一抹暗江城入夜星河淺澹明度水烟寒千樹暝
隔林雲臥一僧清絡蟲故故催機杼木葉蕭蕭送雨聲
獨坐山窻情自會燈花無那向人生

將從衢州陸行至常山

明孫一元

江山二月欠芳菲白露黃雲慘不開石碓自春知水長
布帆初飽覺風來旗亭喚客春嘗酒驛路懷人曉見梅

世味已諳灘百折山行明日又千迴

西湖遊覽

明 田汝成

蘇堤如帶束湖心羅綺新妝照碧潄翠幕淺寒憐草色
華筵小簇占花林凌波人渡纖纖玉促柱箏翻疊疊金
月出笙歌斂城市珠樓縹緲彩雲生

孤山寄太白山人

明 鄭善夫

為問山人孫太初交情歲晚莫教疎孤山梅萼春相惱
滿地松苓日自鉏江夏肯容禰處士茂陵初臥馬相如

知君不廢茗溪釣書帛能無寄鯉魚

寓雲居得張龍湖相公書

明施峻

精舍茗甕隔翠微我來便覺世情違疎燈照雨簷花落
短鬢臨風木葉稀白鴈虛疑千里信青山容得幾人歸
詩成正在鐘鳴後獨立空庭攬舊衣

履省任後之吳興部戲作

明王世貞

縱然名姓墮塵寰身比閣黎可較閒錫杖乍飛天竺寺
芒鞋還踏道場山三生公案聊須檢十部除書了不關

細雨斜風應便往故鄉原在一帆間

山行至虎跑泉庵次蘇長公石刻韻

明

王世貞

百草沾風蠶月香雙鳩喚雨麥秋涼過橋已覺世情少
到寺始知僧日長拂蘚石留行脚偈挂瓢泉是洗心方
良公更有茶瓜在禪悅能容取次嘗

錢塘夜泊

明

王穉登

孤舟三日雨淙淙夜泊錢家舊建邦桑過石門青拂枕

水經橋李黛含窻六橋花盡休攜酒五月潮平好渡江
此去報恩慚烈士匣中龍劍氣難降

李舍人孤山草堂坐雨

明
王穉登

筍興行過斷橋來樓上銀罌水上開白鳥數行猶似鶴
青山五月已無梅雨昏不辨絲千縷湖淥渾疑酒一杯
幾欲題詩題未得舍人元是謫仙才

會稽道中

明
王穉登

江東名郡古無雙處處青山照玉缸竹箭一流明客枕

芙蓉兩岼夾松窓清猿夏斷稽山廟急雨潮平孝女江
此地何須嘆淪落買臣頭白始為邦

雨中同諸君遊東錢湖

明 王穉登

亂崖層壑水粼粼一見漁舟一問津修竹到門雲裏寺
流泉入袖雨中人地從南渡多遺恨湖比西家亦效顰
酒似鵝黃人似玉不須深嘆客途貧

錢王祠

明 王穉登

玉帶龍衣貌宛然朱門碧殿暮湖邊行人下馬看碑字

高柳藏鷗拂廟墻禾黍故都州十四波濤殘岼駘三千
傷心一片厓山地月色潮聲更可憐

林純卿卜居西湖

明

王穉登

藏書湖上屋三間松映軒窗竹映關引鶴過橋看雪去
送僧歸寺帶雲還輕紅荔子家千里疎影梅花水一灣
和靖高風今已遠後人猶得住孤山

謁于肅愍公墓

明

沈明臣

空山下馬謁荒墳寢廟豐碑禮數尊敢信不移鐘鼎日

便忘歸賜屬鏤恩松楸永閔孤臣骨天地長依九廟魂
門戶誰憐房杜少守祠聞說有雲孫

登明州郡城樓

明 沈明臣

縹緲高樓倚日曛萬山寒色大江分橫天中斷疑為雨
截海東來半是雲老尉亭侵龍女廟官奴城對鮑郎墳
登臨細數前朝事謂有黃晟領冠軍

錢塘

明 柳雲霄

天隨望落低低鳥海欲潮生細細風表戀客邊春夜冷

夢依天末翠微空
雲深碧樹渾經濕
日落清江半染紅
愁倚西樓芳草合
吳山越水暮烟中

曹娥江寄京口諸友人

明
陳鶴

曹娥江上浪如花
數幅蒲帆過浦斜
烟際亂山明落日
樹中古廟帶殘霞
乾坤故舊勞魂夢
客路星霜換歲華
鳴雁滿天無信息
相思一夜遍天涯

西湖卽事

明
張凱元

十里長堤柳色新
六橋凝碧水粼粼
桃花似妬青樓女

楊柳如思白舍人鶯語風前猶自澀山容雨後尚含顰
武陵舊日通來往不向漁郎數問津

錢塘蘓小茜羅衣短棹穿花過釣磯望帝聲中怨離別
夢兒亭下惜芳菲微風吹藻鱗鱗浪落日銜山樹樹暉
最是碧雲隨處合美人乘興夜忘歸

西湖

明
何璧

垂楊漠漠荇田田何處春風十四絃放鶴僧歸天竺雨
聽鶯人過六橋烟詩尋蘿薜誰邊寺酒載桃花第幾船

遊子天涯魂易斷
非關春樹有啼鵲

若耶溪獨往

明
沈一貫

編竹為船任所之
高低白石上灘遲
水波不待春生後
山色偏多雪霽時
到處谿邊憐謝客
誰家村裏問西施
小橋野店人爭席
縹緲松烟入午炊

道場山贈栖雲禪者

明
徐渭

古塔臨空寶閣欹
雲峰上去路逶迤
山田穫稻行人出
湖水行舟落葉移
風靜鳥翔施飯石
日斜魚聚放生池

遠公心地元無住却共飛雲此住持

蘭亭次韻

明
徐渭

長堤高柳帶平沙無處春來不酒家
野外光風偏拂馬市門殘帖解開花
新觴曲引諸溪水舊樹巖垂幾樹茶
回道永和如昨日不堪悵望晚天霞

岳公祠

明
徐渭

墓門朱戟碧湖中湖上桃花相映紅
四海龍蛇寒食後六陵風雨大江東
英雄幾夜乾坤博忠孝誰家俎豆同

腸斷兩宮終朔雪年年麥飯隔春風

登天目宿寶珠上人房

明徐渭

天目高高八百尋夜來一榻抱千岑長蘿片月何妨挂
削石寒潭幾處深芋子故燒殘葉火蓮花畧現大江心
明朝欲借橫空錫飛度西山再一臨

登北高峰宿絕頂僧舍即事

明程嘉燾

雙峰徑轉石林蒼攜客捫蘿宿上方澗飲斷虹明積翠
湖飛片雨亂斜陽東來島嶼吞江郭西去山雲指故鄉

夜久禪心同寂歷松風諸嶺一何長

烟雨樓

明
韓子祁

層樓百尺點空濛東指蓬壺一葦通
春雨自添湖上碧晚霞輕抹浪頭紅
萬家烟火浮天外午夜星辰落鏡中
醉坐漁磯還獨酌却將鴛渚作鰲宮

自北鴈蕩踰南鴈蕩觀龍湫瀑布作

明
朱國祚

靈域岩荒隱不知中藏七十二峰奇
披衣正在烟深處

到面初無雨歇時謝客未曾經蠟屐貫休已後少題詩
洞天只恨流傳晚莫覩蟲書鳥篆碑

西湖春日戲贈潘景升

明 柳應芳

武陵門外正春華十里空湖帶淺沙夾岸樓臺千佛地
隔城簫鼓萬人家青絲遊騎乘朝日紅粉回舟映晚霞
莫訝劉郎歸未得六橋芳樹半桃花

宿虎跑寺

明 吳鼎芳

濕烟鬱結亂山橫鼓斷鐘殘火自明野寺冰霜經晚歲

石林風雨坐殘更十年一夢浮雲冷四海孤身落葉輕
願得皈依清淨海蓮花香裏證無生

陳侍御西湖莊

明
陶奭

名場羨爾一身收墨詔新街拜醉侯艇子舊裝蓮葉樣
吳兒殊有串珠喉輕輿軟徑花間馭晚翠濃烟水上樓
我有清狂公記取十旬三度淨慈遊

夜渡若耶溪

明
錢希言

樵風舟上鼓頻撾十幅輕帆渡若邪照破離愁惟夜月

啼殘歸夢是寒鴉霧蒸冬塢山城暗烟鎖西陵驛樹斜
只隔錢塘衣帶水依然旅食傍天涯

會稽懷古

明
徐 燊

獨上高城問廢興萬家鱗次暮烟凝斷碑碧蘚曹娥廟
古木蒼山夏禹陵剡雪霏微迴客棹樵風來往送漁燈
越王霸業長消歇極目荒臺感慨增

送沈廣文擢德清令

明
徐 燊

新懸墨綬謝青氈仙令栽花向雪川處處勸耕黃稻雨

村村收繭綠桑烟官清但飲雙溪水吏散閒尋半月泉
莫戀彈琴寬賦稅司農方急水衡錢

遊西湖

明
張復亨

山翠湖光畫染麻珠宮縹緲晚鐘微僧尋三竺沿堤過
鶴認孤山背水歸橋影亂分公子棹荷花輕著美人衣
繁華不醉飄零客愁聽啼鵲又夕暉

雨經富陽

明
曾異撰

小縣飛樓俯驛亭竹間樹杪恣揚舲溪山病亦開篷看

風雨眠猶剪燭聽永野潮來江上白浮嵐畫入井西青
石尤前路無妨阻好住巖灘問客星

錢塘東望

明陳子龍

青溪東下大江迴立馬層崖極望哀曉日四明霞氣重
春潮三折浪雲開禹陵風雨思王會越國山川出霸才
依舊謝公攜妓處紅泉碧樹待人來

于忠肅祠詩

明陳子龍

紫蓋烽煙竟不旋手持大計靖江天北門虎臥回鑾日

南內龍飛賜劍年山外怒濤歸碧海
豕邊荒草像祁連
上皇猶想風雲際曹石功名倍黯然

南鎮

明
陳子龍

靈嶽迢遙積翠浮萬年作鎮表炎州
天開雲雨參衡霍
嶺絕星辰上斗牛
禹穴有書來帝錫秦碑無字記宸遊
振衣直拂扶桑影矯首仙人十二樓

苧蘿山

明
陳子龍

浣紗溪對苧蘿山越女明粧映翠鬟
一日綺羅嬌水上

千秋花草滿人間
春風宿麥荒村靜
夜月啼烏古殿間
無限江流東向去
不勝哀怨到吳關

同祁世培侍御泛鏡湖

明
陳子龍

越溪千折繞山流
黛色橫分曉蕩舟
五月陰晴天漠漠
一川風露草悠悠
鳴榔空翠烟中市
捲幔輕紅水上樓
十二雲鬟飛不定
獨留明鏡照人愁

天台萬年寺

明
陳子龍

迴合千峰嘉樹林
蒼崖碧殿畫陰陰
雲生薜荔虛巖動

日隱松杉絕澗深僧贈紫衣壇卓錫經傳白馬字黃金
更從閣道凌飛磴悵望諸天清磬音

烏傷雙林寺

明陳子龍

祇林蕭瑟晴山暉古殿陰陰燈火稀花露迴同清梵落
松風欲送午鐘微雲浮阿育常如蓋樹自梁朝尚掛衣
為問殘碑思孝穆更尋荒草一峯歸

秋日登越州能仁寺高閣

明陳子龍

極目層霄積翠浮振衣縹緲玉臺遊湖明萬井雲中宅

地湧諸天海上樓丹嶂風烟搖落日黃雲禾麥動清秋
仲宣蕭瑟耽詞賦面面憑欄起暮愁

國朝

戊申上巳過吳興家園次太守

吳偉業

六客堂西楔飲臺亂山高會嘯歌開塔懸津樹雨
中出鐘送浦帆天際來同輩酒狂眠白日前賢墨
妙洗蒼苔右軍勝集今誰繼仗有吾家李重才

贈吳湖州

湯斌

仙郎起草最知名幾載寒帷雪上行按部雨餘香
稻晚課農花發曉雲輕南宮書畫添新譜李相亭
臺續舊盟聞道賓朋常滿座清尊真見古人情

越中詠古二首

蔣平階

句踐城荒越舊都越王高冢枕兵符誰銜寶劍酬
明主空采黃金鑄大夫樂野春畋餘馬樞五湖秋
祭冷冰厨何來霸氣為南斗苦竹山前聽鷓鴣
若耶溪畔木蘭船猶是當初教舞年一入吳宮難

再得至今浣女自相憐
亭蘿深處尋紅粉
蓮葉開時想翠鈿
不為君王恩顧重
肯將嚬笑向誰邊

鶯脰湖

陳維崧

鵲李重遊入畫圖
清江一望更躊躇
黃鸝欲語春潮急
紫燕將歸夜月孤
蓀蓀邨墟紛雁鷺
蕭蕭澤國響菰蒲
故園花落行將半
獨對春風鶯脰湖

嚴灘

潘問奇

漫整荷衣酌逸民
灘聲猶自動星辰
富春近日誰

漁父天子當年有故人名到先生纔是隱賢如光
武不曾臣羊裘去後烟波濶留得桐江一釣緡

富春山中弔謝臯羽

徐夜

晞髮吟成未了身可憐無地著斯人生為信國流
離客死結嚴陵寂寞鄰擬向西臺猶慟哭思當南
宋合酸辛我來憑弔荒田曲朱鳥魂歸若有神

郡城秋眺

李鄴嗣

有客江城共攬衣登臨不盡望斜暉水從脣口中

卷一百七十六
門入山自峨嵋半夜飛千載純鉤餘劍草一編越
絕問漁磯邨東漸聽人聲近知向荒崎采鮎歸

雨中憩吳山道院

周茂源

石壇高館鬱崢嶸香霧微茫卷翠旌玉女窻涵山
雨潤仙人樓瞰海潮平瑤笙白鶴空中舉錦樹繁
花坐外明夜向朝元探寶籙雙珂儼作步虛聲

夜泊錢塘

周茂源

津亭極望海門遙水國輕寒夜沈寥隔岸青山神

禹廟中流白浪伍胥潮春星萬點連漁火宿雨兼
旬變柳條咫尺桐江圖畫裏牽舟無奈石尤驕

桐江晚眺

周茂源

擊汰揚舲起櫂歌樓船功業愧蹉跎春江貫酒臨
江近水市張燈入夜多客渡風湍黃石岬人家烟
雨碧山阿虎頭若在堪乘興應寫滄洲滿越樓

靈隱

王鴻緒

西湖梵宇知多少靈隱珠林昔所聞夜靜朗懸三

竺月天明高落兩峰雲
隔山鐘磬時時應
合寺巖泉處處分
覽勝却來當日午
僧厨一飯覺清芬

韜光

王鴻緒

又訪韜光厯翠微
山門分徑轉春霏
峰頭泉瀑聯珠下
城上江湖匹練飛
繞樹好花頻撲面
穿林細雨欲沾衣
到來一借僧房住
祇覺雲深何處歸

冷泉亭

潘耒

寺門泉水澹淪漪
水面靈峰對不移
黃葉一天霜

落早白松滿院月來遲濯纓清徹三生夢照影寒
驚兩鬢絲自是心情愛孤冷獨行惟有澗猿知

赤城

潘耒

不共千山疊翠看獨將秀骨戛雲寒瓊樓削出三
層峻霞彩裝成一色丹影動天風孤塔迴門迎海
日兩巖寬玉京只在人間世未洗中腸欲到難

石梁觀瀑布宿方廣寺

潘耒

豈必前腸訪化城巖邊古寺最幽清僧於紺髮光

中坐客在銀虹頂上行不夏松杉含雨氣無眠樓
閣撼濤聲應真留我遙招手一墮紅塵便隔生

謁方正學先生祠

潘耒

太平良相學優為事到艱難節始奇力以一絲誰
九鼎忍將十族博專祠潮青緱里啼鵲慘月冷龍
岡語鶴悲後裔可憐仍死國一堂俎豆最相宜

表忠觀

朱彝尊

城邊碧瓦樹靈旗廟口明湖濯翠微罷聽緩歌歸

夜月獨存豐碣對閒扉
錢塘白馬迴犀弩玉座青
苔上錦衣保障東南功不細
祠官異代豈相違

禹廟

毛奇齡

夏王四載告成功別禪苗
山起闕宮玉帛千秋新
裸薦衣冠萬國舊來同
金書瘞井封泥紫窳石懸
花映篆紅一自百川歸
海後長留風雨在江東

重過祁中丞寓山別業

毛奇齡

中丞別業寓山莊垂柳依然覆野塘
北砦舊扉巖

下遠南湖高閣雨中涼幽闌石竹翻鴉子敞殿金花供象王止水可憐沉劍履重來擬檢碧霞方

塘棲道中

周起渭

淡靄濃光作意鋪遠山如有看如無雲林幾疊溪流曲夏木千章野鳥呼紫翠浮來烟島出夕陽明處水亭孤六橋此去無多路清夢今宵已到湖

重泛西湖留別

周起渭

熟梅雨足漲晴波柔艣聲來碎芰荷出浴峰巒當

境好起眠楊柳受風多青山處處餘詩酒別眼昏
昏對綺羅暈碧裁紅心力減自慚無奈晚烟何

次韻臨平道中禊日逢寒食

龔翔麟

久矣青鞵倦遠探無端江北忽江南歸程剛到半
山半春事恰逢三月三細雨斜風作寒食流觴曲
水侈空談感時不覺吾衰甚詩力人前較未堪

紫陽山丁野鶴亭

王修玉

草閣平臨古澗寬流泉疎竹繞齋壇人歸化鶴長

遺世客到題詩獨倚欄
紫蔓着花秋色老蒼松落
子雨聲寒尋真更向峰頭去
洞裏仙人碧玉冠

泊富春城下

王修玉

孤城一片水雲間
黃葉丹楓滿目斑
今日已無黃
子久誰人能畫富春山
沙汀渺渺漁舟聚
烟雨霏
霏宿鳥還自笑
此行無一事
虛隨估舶度江關

題天竺定上人山居

張競光

屏迹春山枕翠微
竹房寂歷偃荆扉
六塵縹緲黃

雲靜三徑陰森白日稀天竺先生懷古處南宗高
士蘊清機深花碧草垂垂發檻外流泉百道飛

禹廟

方士穎

藏書宛委記東巡廟闕稽山近與鄰千禩豆籩傳
子姓一堂圭壁列君臣衣冠窆石文無字風雨梅
梁畫有神俗尚春遊誇勝事笙歌十里汎舟頻

海忠介公祠

方士穎

曾編治譜澤斯民勁烈風追古大臣抗疏楓宸還

折檻持綱柏府尚埋輪衣冠座凜威儀舊俎豆壇
昭典制新一曲空潭寒貯月澄光永照骨嶙峋

八詠樓舊址

方士穎

憑高勝蹟倚城開劫火昆明閱幾回嘯詠尚餘梁
翰墨登臨無復宋樓臺華峰北峙青嵐疊澗水西
流綠漲洄欲和遺詩寄遙慨蒼茫不盡夕陽頽

次蘭溪

方士穎

樓臺露郭影涵波一帶帆檣聚客槎塔卷林烟高

入岫橋吞澗水曲通河隨舟菜鬻蕪菁早滿市花
陳茉莉多深夜不愁溪路暝傍崖燈火照人過

過龍游驛雨甚舟行日不能數里 方士穎

江城始報及龍游欲挂輕帆阻石尤穀雨漲高侵
柳葉茶圩烟濶覆蘋洲支篷慘淡昏如暮擁袂淒
清冷似秋挽入林崖紆可泊啼鵲故引客心愁

萬松書院即事

方士穎

憑將宋址拓經營曲嶂周遭擁畫楹制擬膠庠崇

至聖名方嶽麓萃諸生城邊雨散江湖濶嶺外烟
浮野市平共仰普天敷

教澤人文式化已觀成

癸巳暮春重遊西湖喜晤武林諸同志

王式丹

日傍山椒溯水涯芒屨幾兩踏煙霞大招岳墓兼
于墓小憩林家與葛家高嶺雙尖蟠老木平湖四
角長新葭盪胸自要尋邱壑弔古懷人一倍加

層巖崿聳俯清流騁目登臨占上頭近郭烟橫不
斷樹隔江山入最高樓窻搖竹色精廬迴門聽潮
聲古剎幽坐對奇峰忽忘返欲移家具住杭州

同淮江登東湖弄珠樓

查慎行

但令興到便行船我得同遊亦偶然疎磬晚潮孤
影塔暖雲濃樹四垂天稱心圖畫憑欄外經眼亭
臺落照前却笑詩成無傑句驪龍依舊抱珠眠

雨中奉陪座主徐公韓太子遽放舟夾山漾欲遊

栖賢不果歸登峴山作四首

查慎行

過盡迴谿十里長孤城回首漸微茫
風腥曉氣魚蝦斷水減秋痕雁驚鄉
菱蔓欲牽絲已脆荷花雖敗葉猶香
船頭忽指前遊處白塔紅亭認道場

野色天光入望奇融成一片綠琉璃
展開手卷王蒙畫收拾才情杜牧詩
畢竟清遊宜寂寞尤難好景是迷離
桃花莫被漁翁誤秋在斜風細雨時
選勝初期汗漫遊栖賢不到恨空留
橋低忽礙尋

山路興盡非闕冒雨舟瓦竈分泉烹紫笋印泥開
甕試清筍買田合向吳興住蟹舍漁莊一網收
亂石多成劈斧皴窪樽亭外勢嶙峋一州文物傳
孤碣前輩風流剩兩人屏擁卞山高簇簇簾鋪雪
水細鱗鱗名園長泊鷗波畔細數陪遊第幾巡
登寶婺樓

查慎行

斗杓倒插勢凌虛高出城端五丈餘一鳥自投天
際沒羣山浮動雨來初別開戶牖通呼吸旁引風

雲入卷舒八詠門荒詩境改讓他仙子占樓居

曉晴發清湖鎮舟中望江郎山
查慎行

碓床石瀨響泠泠愛入歸人舊耳聽岸草綠痕移
蟋蟀水花紅影帶蜻蜒樵爭晚市秋初霽風轉荒
灣樵一停雲霧不遮南望眼三峰回首徧天青

山陰道中喜雨
查慎行

謝家雙屐舊曾攜轉覺清遊愛會稽白塢紅亭山
向背赤欄烏榜岸東西波光拂鏡羣鵝浴竹氣通

烟一鳥啼野老豈知身入畫滿田春雨自扶犁

三月二日偶遊硤石精舍

查慎行

三月風光連上巳人如蛺蝶鬪裙衫兩山鐘磬東
西寺十里烟波遠近帆拄杖我來尋履跡題詩僧
乞署頭銜篋中亦有新排集倘許經房貯一函

從東山大悲閣步上南道院

查慎行

山北山南一徑通又從紺宇叩琳宮千年樹老根
穿石百尺梯危勢轉空上界神仙風肅肅下方樓

閣雨濛濛羽人何福能消受長在晨霏夕靄中

湖州

陸世楷

輕烟細雨過苕溪浮玉諸峰望盡迷柳下閒眠春
後犢桑巔遠聽午時雞境通震澤帆檣聚山傍孤
城雉堞齊此地風流懷杜牧綠陰幾樹接前堤

山陰潘烈女詩

潘公調之女年十四許同里袁氏子袁輕狂無行將別求婚欲渝盟

而不得造作穢語以汚之烈女聞遂投井死矣
天悲鬱旋久停不腐遠近驚以為神釀全即其

地利

焉

周炳曾

鴛譜中間錯幾行紅絲偏繫黑衣郎將珠投暗真
如礫以鴂為媒豈必魴清白一肌不受汙毒炎五
月忽飛霜道旁井渫心為惻碧血千年恨未忘
貧家好女淨梳頭月扇難遮一面羞休比潘妃絕
辱井爭如魯婦赴清流露筋未報蚊虻毒精衛寧
忘渤海仇血散血凝大塊裏三生因果費追求

夏日雨中游雲林

楊弘緒

一雨連山暑氣微撥雲開處見禪扉泉聲清客知

為冷山勢驚人認作飛
踏屐欲尋三竺路
打包又趲一僧歸
探幽正起無窮思
忽被村童笑繡衣
金蓮池用韜光答樂天韻

徐陶璋

高僧卓錫響林泉
曾坐蒲團日晏眠
乳穴常流新玉液
窪池猶長舊金蓮
禽心靜息花間夢
魚影空搖水底天
我亦暫離塵土思
風吹清磬落巖前

天台雜咏

朱倫瀚

巨靈開鑿是何年
引出飛流百丈泉
一片奇雲橫

絕壁半空靈雨下晴天雷驚電掣看奔谷雪淨霜

明訝飲川惆悵孤亭零落盡濺珠無復上階圓

古有

觀瀑亭

今廢

日午停驂佛隴西迢迢鐘磬度招提空山尚說金

銀地

二嶺名

野水還分青赭溪

二溪名

一縷烟微僧飯

後半竿幢露講筵低穿巖更入圓通洞

洞在高明寺後

萬

壑松聲雜鳥啼

浙江通志卷二百七十六